

210—
I D E A
PHILOSOPHIÆ
SIMULATÆ,
NON VERÆ,
IN
SCIENTIA JURIS
ET
FORENSI.
CUM PRÆFATIONE
AUCTORIS.

*****:*****

ANNO MDCCXXXV.



P R Æ F A T I O.

DE Protagora, magni nominis viro apud Græcos veteres, (1) commemorat Notitium Atticarum facundus scriptor, (2) quod, cum adolescens onera bajulando victum quæreret, Democritus Abderitensis Philosophus (3) viderit cum extra urbem sarcinam lignorum vinculo brevi artificiose colligatam portantem, quam solvere jussus, eadem arte & industria iterum conjunxerit. Quo facto, ingenium hominis admi-

- (1) Diog. Læert. *Vit. Philosophor. lib. 9.* Athenæus *Convival. Scrm. lib. 8.* Cicero in Bruto *cap. 8.* & *de Natur. Deor. lib. 1. cap. 23. 46.*
- (2) Aul. Gellius *lib. 5. cap. 3.* vid. Fabrit. *Bibliothec. Latin. vol. 1. lib. 3. cap. 1. pag. 508.*
- (3) Idem ille, quem ille, quem insipienter ridentem fingunt & pingunt imperiti. Fabulam hanc cum aliis risit Gundlingius in *Otiis part. 3. cap. 1. §. 6.* & Heumannus in *Adis Philosoph. part. 1. pag. 15. junct. pag. 436.*

erit. Neque dissimulavit hoc Gellius, cum Protagoram acerrimum quidem Sophistam, sed insincerum Philosophum fuisse ait, eumque in omni sua verborum atque locutionum arte à discipulo Evathlo insigniter delusum, alio loco recenser. (7) De ipso igitur Protagora non admodum laudabiliter sensit posteritas. (8) Honorificum enim, si origo spectetur, Sophista-

ling. in *Otiis part. 3. cap. 7. §. 5.* Heumann. *AB. Philosoph. part. 2. pag. 273. 300.* Hæc plerorumque Græcorum fuit Philosophia, Cicer. *diß. Acad. Quæst. lib. 4. cap. 37. diß. AB. Philosoph. part. 2. cap. 3. pag. 292.* Fuisse tamen inter eos jactatores magniloquos, exemplo *Hippiæ* illius docemur, de quo narrat Cicero *lib. 3. de Orat. cap. 32.* gloriatum fuisse, quod nihil esset ulla in arte rerum omnium, quod ipse nesciret: nec solum has artes, quibus liberales doctrinæ atque ingenæ continerentur, Geometriam, Musicam, Literarum cognitionem & Poëtarum: de hominum moribus, quæ de Rebus publicis dicerentur: sed annulum quem haberet, pallium quo amictus, soccos quibus indutus esset, de sua manu confecisse.

- (7) Gellius *lib. 5. cap. 10.* Decem millia denariorum promissa fuisse Protagoræ, refert Quintilianus *Instit. Orat. lib. 3. cap. 1.* Imperiti vero fuere Judices, quibus controversia cum Evathlo (similis posset accidere hodie) visa est insolubilis. Nam quod Protagoras solutionem reliquæ pecuniæ usque ad litis cujusdam victoriam differri pepigerat, h. e. in casum incertum, ipsi sibi imputare debebat.
- (8) Arrogantiam Protagoræ, & qui ei erant similes, contemptum Religionis, inter Ethnicos etiam vituperatum, satis notavit Cicero *locis supra dictis*, & de *Natur. Deor. l. 2.* Nec non Themistius *Oratione supra allegata.*

phistarum nomen, cum multi jaſtantiæ tantum verborum & concluſiunculis fallacibus darent operam, eamque artem ad quaſtum converterent, pecuniarum ab adoleſcentulis acquirendarum æruſcatores, in vitio haberi cœpit. (9) Nimirum ſicut in deſcribendis lineis una tantum fieri poteſt recta, earum vero quæ à via recta diſcedunt ſpecies dari poſſunt innumera; Ita etiam qui à veritatis ſimplici via abeunt errores, ſunt infiniti. Inter hos eſt maximus, ubi loco veri apprehenditur falſum, injuſtum pro juſto, pro luce tenebræ. Si modo liceat errorem vocare quod eſt in genere morum turpitudine graviffima, non excuſanda ſed coërcenda. (10) Cauſam aperte frivolam dicere

(A) 3 juſtam

- (9) *Ad̃a Philoſoph. part. 1. pag. 37.* Audax negotium Sophiſtarum dicit Cicero, quod de re quavis dicere auſi ſint, & quidem docte, *de Finib. lib. 1. cap. 1.* Cum primis odioſum erat, quod iſti ſapientiam ſibi arrogarent ſolis, Themiffius *Orat. XXIII. pag. 286. 244.* & *Orat. XVIII. pag. 161.* quod verborum rationem, mercede conſtituta, traderent adoleſcentibus, *diſſa Orat. XXIII. pag. 289. 294.*
- (10) Si quis inſanire voluerit in opinionibus ſuis abſque alterius damno, contemtui ſeſe exponet omnium. Alii oſtentationis gratia nivem atram eſſe, ſolem non lucere, & ſimilia, diſputationibus ineptiffimis defendere ſunt auſi, vid. Cic. *Acad. Queſt. IV. 7. ſeqq. & cap. 23.* Qui etiam, *lib. II. de Divinat.* Nefcio, ait, quomodo nihil tam abſurde dici poteſt, quod non dicatur ab aliquo Philoſophorum. Ubi vero de iis officiis hominum agitur, quæ ſunt honeſta vel turpia, juſta injuſtave, defendere nefaria & impia minime licet. Apud eundem *lib. 2.*

justam puduisse etiam Sophistas, qui honestatis sensum non exuerunt, videtur probabile; Quid enim magis dici posset ab humanitate alienum, quid inverecundius, & ad omne vitiorum genus proclivius? Neque adeo calumniarum magistrum fuisse Protagoram putro, qua arte existimationem acquirere sibi non potuisset, sed iis argumentis operam dedisse quæ cum specie veri proferri poterant in medium. Morem hunc excusat ipse *Tullius*, cum patronis causarum licitum esse affirmat, (neque tamen cum omni fiducia) nonnunquam verisimile, etiam si minus sit verum, defendere *lib. 11. de Offic. cap. 14.* Orationis hoc artificium quanquam valere aliquid possit apud incautos, in accuratio-

lib. 2. de Offic. cap. 14. & lib. 3. cap. 17. digna leguntur verba, quæ huc transferantur:

*Aliter Leges, aliter Philosophi, tollunt astutiam. Leges, quatenus manutene-
re possunt: Philosophi, quatenus ratione & intelligentia. Ratio igitur
hoc postulat, ne quid insulsose, ne quid simulare, ne quid fallaciter.*

Et porro: *Hoc quanquam video, propter depravationem consuetudinû, ne-
que more turpe haberi, neque aut Lege sanciri aut Jure Civili: Natura
tamen Lege sancitum est. Societas enim est (quod etsi sæpe dictum est, di-
cendum tamen est sapius) latissime quidem quæ pateat, hominum inter ho-
mines: interior eorum, qui ejusdem genti sunt, propior eorum, qui ejus-
dem civitati.*

Pergit: *Quocirca astutia tollenda sunt eaque malitia, quæ vult illa quidem
videri se esse prudentiam, sed abest ab ea distatque plurimum. Prudentia
est enim locata in delectu bonorum & malorum: malitia (si omnia, quæ
turpia, mala sunt) mala bonis ponit ante.*

Porro: *Ex quo intelligitur, quoniam Juri natura fons sit, hoc secundum
naturam esse, neminem id agere, ut ex alterius prædetur inscîentia. Nec
ulla perniciosior vicia major inveniri potest, quam in malitia simulatio intelli-
gentia. (Ex quo illa innumerabilia nascuntur, ut utilia cum honestis pug-
nare videantur.)*

ratori tamen examine destruitur facile, ad argutias & vafriciem referendum potius quam ad Philosophiam sinceram. (II) Alia ratione à recta via discedunt simulato res, qui, quod non sunt, externa specie mentiuntur. De iis non dico, quibus est voluptati ut adsumtis vestibus mentititiis vel larvis spectaculo sint aliis, & sibi met ipsis: Eos potius designo, qui, ut videantur sapientes, imitantur vel magistri sui vel discipulorum melioris notæ cultum mores & instituta. Id quod imprimis fieri potest, si sit aliqua hominum secta vel societas professione & cultu externo ab aliis segregata, peculiarem honorem affectantium. Tales erant inter Græcos philosophico habitu incedentes, pallio & barba superbientes, moribus à vita communi abeuntibus venerationem & admirationem sibi promittentes, (12) quorum nonnullis vitæ hujus commoda erant
despe-

(11) In eodem censu sunt caufidici, qui multitudine allegationum ex Auctoribus, quos plerumque ipsi non viderunt, chartas implent, Judicem doctrinis istis fortassis opus habere putantes. Contemtui non sunt allegationes bonæ, ad factum recte applicatæ, sed generalibus principiis & citationibus ad rem parum facientibus folia illiniunt non nisi λογισται imitari.

(12) Vid. *Tit. Cod. Theodos. de Medicis & Professoribus lib. XIII. l. 7.* quæ est in Codice Justiniano repetitæ prælect. *l. 5. de Professoribus*, & in eam *Commentarium Jacobi Gothofredi. Gellius N. A. lib. IX. cap. 2. & lib. XIII. cap. 23.* ubi præstigias notat Græcorum quorundam philosophari sese dicentium, umbrasque verborum inanes fingentium, qui se nihil habere,
& ni-

despectui : Alii ne decori quidem observantes, qui seculo nostro ad desipientium societatem fortassis dimitterentur. (13) Sunt denique alii à Philosophia vera

recede-

& nihil tamen egere, ac nihil cupere dicant, quum & habendo & egendo & cupiendo ardeant, adde Everhardi Ottonis *JCti Orat. de vera JCtorum Philosophia*, à Gotth. Slevogtio in *Libello de Scis & Philosophia JCtorum editam pag. 309.* Illud te moneo, inquit Seneca *Epist. V.* ne eorum more, qui non proficere, sed conspici cupiunt, facias aliqua, quæ in habitu tuo, aut genere vitæ notabilia sint. Asperum cultum, & intonsum caput, & negligentiore barbam, & indictum argento odium, & cubile humi positum, & quicquid aliud ambitionem perversa via sequitur, evita. Satis ipsum nomen Philosophiæ, etiam si modeste tractetur, invidiosum est. Scilicet illo tempore, quo Pseudophilosophorum erat colluvies, ut loquitur Imperator *diſſa Lege septima.*

- (13) Finge hominem multa scientia instructum, moribus priscis illis Philosophis similem, decori vero contemptorem, (vereor ne dentur hodie tales, neque sit opus fictione) quis quæso istius virtutem esset laudaturus? Sunt ita connexa honestum, justum & decorum, ut contemplatione quidem recte distinguantur, in actione vero separari non debeant. Virtus non est quæ neglectu decori est maculata. Prædicet mihi qui voluerit virtuosos Cynicos, quos, cum indecore & sordide vixisse omnes affirmant, ego putarem, si essent tales hodie, in existimatione & numero sapientum non futuros. Vix est, ut Catonis illius Romani, hominis, ita laudante Tullio, in omni virtute excellentis atque integerrimi, asperitatem nostrum ferat seculum, de quo Gellius *lib. XIII. cap. 23.* narrat, fuisse opulentum, neque tamen usum ædificio, vaso, vestimento ullo pretioso. Si quid est, quod utar, (dixisse Catonem) utor, si non est, egeo. Suum cuique per me uti atque frui

recedentes, qui vel per infelicitatem ingenii vel per tarditatem instructionis, tum vero impatientiam, & nescio quam opinionem rei non admodum necessariae, ad solidiora studia non adspirarunt, nihilominus tamen permodicum aliquid scientiae quod velut in transitu decerptum retinuerunt, ita in usum vertere noverunt, ut profundior & amplior quam est appareat ignaris, locum quem fortuna secunda nacti fuere inter ceteros tuentes. Hi, vulgari nomine, *Schlendriani* dicuntur discipuli.

Non errabo multum, si omnes istas aberrationum species appellatione una, *Philosophia simulata*, complexum esse dicam *Domitium Ulpianum*, (14)

(B) virum

frui licet, vitio vertunt, quia multa egeo: at ego illis, quia nequeunt egere. Hanc Catonis nimiam in Stoicorum praecepta propensionem inflectere studuit Cicero *Oratione pro Murena*. Duriora enim esse, quam veritas, natura, usus & vita paterentur: Sapientem gratia nunquam moveri: nunquam cujusquam delicto ignoscere: neminem misericordem esse nisi stultum & levem: Viri non esse neque exorari neque placari: Solos sapientes esse, si distortissimi sint, formosos: si mendicissimi, divites: si servitutem serviant, Reges: omnia peccata esse paria: omne delictum scelus nefarium: nec minus delinquere, qui gallum gallinaceum, cum opus non fuerit, quam eum, qui patrem suffocaverit: Sapientem nihil opinari, nullius rei poenitere, nulla in re falli, sententiam mutare nunquam. Hae Stoicorum praecepta, si Ciceroni visa sunt veritati & naturae contraria, multo magis forent societati hominum Christianorum, sapiens istiusmodi plane intolerabilis.

- (14) Vide inprimis *Orationem supra laudatam* Everhardi Ottonis pag. 298. seqq. & 315. Ipse Ulpianus Stoicorum doctrinis imbu-

virum Philosophum juxta & Jurisconsultum, Philosophum, inquam, non contemplationibus nudis intentum & Leges, ad societates humanas quæ sunt in hoc orbe terrarum non adæquatæ, meditantem, sed vitæ activæ inprimis studiosum, experienciâ quoque in arte boni

imbutus quidem, magis tamen ad Herciscundos, h. e. Ecclesicos, erat numerandus, is scilicet, cui quorumvis sectæ Philosophorum ineptiæ erant contemptui. Hoc satis testatus est in libris conscriptis, ex quibus tantum excerpta relicta nobis sunt in *Pandectis*. Huc pertinet l. 1. §. 4. de *extraord. cognit.* ubi à Professorum, publicorum salariis dignorum, numero excludit Philosophos, quia eos hoc primum profiteri oportet mercenariam operam spernere. Porro in l. 6. §. 7. de *Excusat. Tutor.* Existimo, ait Ulpianus, quod qui divitiis superabundant, (de iis qui philosophantur loquitur) voluntarie tribuent pecuniam in utilitates patriæ. (Hoc fecisse Democritum scribunt Historici; vid. Bzlium in *Lexico dicto loco*.) Si autem proprie loquantur de substantia (hoc est, si propriam sibi substantiam patrimonii esse voluerint) inde jam manifesti fient non philosophantes. Parallelus est Papinianus l. 8. §. 4. de *Vacat. & Excusat. Muner.* cum ait: Vere philosophantes pecuniam contemnunt, cujus retinendæ cupidine fictam adseverationem detegunt. Hæc omnia ad contemptum istius temporis, Philosophorum, simulatorum scilicet, dicta fuisse puto. Nam, quod Philosophiæ veræ axioma sit mendicitas, vel quod Philosophum deceat agere parasitum, hoc JCtos istos prudentes statuisse, credibile non est.

Ingenium quondam fuerat preciosius auro,

At nunc barbaries grandis, habere nihil.

cecinit tempore suo Ovid. *Elcg. lib. 3.*

Ad eandem sententiam rescripsere Imperatores in l. 8. *Cod. de Professor. & Medic.* l. 6. *Cod. de muneribus patrimonial.*



boni & æqui confirmatum. (15) Is, cum Libro Primo Institutionum (16) *Iustitiam*, inquit, *colimus & boni & æqui notitiam profitemur, æquum ab iniquo separantes, licitum ab illicito discernentes, bonos non solum metu pœnarum verum etiam pramiorum exhortatione efficere cupientes, veram, nisi fallor, Philosophiam, non simulatam affectantes*; (17) Philosophiæ nomine utitur, significatione generaliore qua etiam comprehenditur prudentia Juris. Est enim, monente Joh. Schiltero (18) Jurisprudentia pars seu *A'menarua* Philosophiæ practicæ, adeo ut utrique eadem conveniat definitio, ita tamen ut satis esse possit Philosopho, si sciat & ostenderit quid sit legitimum & societati humanæ in cujuscunque statu conveniens generaliter, ne-

(B) 2

que

- (15) Vid. Gotfr. Mascovii *Commentarium elegantem de Sc&is Scabinianorum & Proculianorum cap. 8. de Herci/cundû, sive Ele&ivis §. 7.* Everhardi Ottonis J&ti *di&. Orat. de vera J&torum Philosophia pag. 268. & 274. seqq.* ubi contra obtre&atores defenditur Ulpianus. *Commentariorum Ulpiani ad Jus Civile Catalogum ex Inscriptionibus Legum in Pandectis occurrentium contexuit Jacobus Labittus in Indice Legum pag. 138. usque 153.* Unde patet magnam partem Pandectarum deberi Ulpiano.
- (16) Unde translata sunt verba in *l. 1. ff. de J&stit. & Jur.*
- (17) *Nisi fallor*, addidit Ulpianus, non quod de animi sui sententia esset dubius, vel quod uni tantum sectæ fuerit addictus, sed modestiæ causa, vid. *supra di&. Orat. de vera J&torum Philosophia pag. 308. in not. subjecta, & porro pag. 294.*
- (18) *Manuduct. ad Philosoph. Moral. cap. 1. §. 14.* Everh. Otto *di&. Orat. pag. 288. seqq.*

que tamen de institutis civitatum & populorum , vel etiam de arte agendarum litium & dijudicandarum sit sollicitus , id quod proprie est Jurisconsultorum. Quod vero Schilterus , Nicolaum Cifnerum allegans *dicto loco* , Jurisperitiam à Philosophia sejungi , illamque absque hac nomen suum tueri posse ait , videntur uterque intellexisse peritiam nudam Legum , quæ ut Jurisprudentem & consultum faciat tantum abest , ut potius qui arte instructus est Leges ex bono & æquo interpretandi & ad factum applicandi , is , inquam , solus veri & non simulati Jurisprudentis nomen sustinere ex merito queat. Bonum , æquum , justum , non sunt diversæ significationis vocabula , sed illustrantia sese invicem. Non est alia cognitio justi , alia ars æquitatis , si hæc pro correctione Juris sumatur. (19) Prudentia quæ Jurisconsultum facit , non versatur solum (repeto verba Schilteri) (20) in interpretando Jure dubio , sed etiam in applicando Jure certo ad factum dubium. Si quisquam alius hanc rem edisseruit diligentius , instruendo officium & judicum & causas agentium in judicio , utrosque ad solidam Jurisprudentiam exhortando , certe inprimis est nominandus nobis *Nicolaus Cifnerus* , vir elegantia studiorum & prudentia Juris celebris , Augusti Judicii Cameralis quondam

(19) *Ulric. Huberus Digress. cap. 5. & 6.*

(20) *Dict. cap. 1. §. 5.*



dam Assessor dignissimus, (21) in Præfatione ad Operum *Francisci Duareni* Tomum secundum. Invenitur hæc Præfatio lectu dignissima in Volumine Operum Scriptorum Duareni apud Wechelios editorum Francofurti Anno 1592. in principio Partis secundæ. Excusa deinde inter Cisneri Opuscula à *Quirino Reutero* (B) 3 edita

- (21) Vid. *Catalogus Collegii Cameralis in Commentat. Systemat. G. M. de Ludolf ad An. 1567. usque 1580.* Vitam Cisneri à *Quirino Reutero* Profess. Heidelb. descriptam repetiit cum aliis Jctorum eximiorum vitis *Christianus Gottl. Buderus*. Unde transferimus huc Elogium Cisneri imagini à Nicol. Reusnero adpositum :

Nicolaus Cisnerus Mosbachii Palatinatus Electoralis oppida natus Anno 1529. spectata Vir industria ac virtutis, qui multiplici exquisitaque omnium pene literarum præstans scientia, Philosophia & Jurisprudencia Doctor celeberrimus, Academia primo Heidelbergensis Antecessor Juris Civilis solertissimus: dein Supremi Camera Imperialis Judicii Assessor per Annos XVIII. integerrimus, Pro-Judex tandem & Senator Illustrissima Septemviralis Curia Palatina dignissimus, pereruditus in omni doctrina genere, ac præsertim in Jure libri scriptis immortalem sui nominis laudem & gloriam apud omnes mortales reliquit sempiternam; Justitia & Equitatis Antistes ac Præf. Opt. Max. Musarum & Historia cultor eximius pie sanctæque mortuus decessit Heidelbergæ Anno Salutis 1583. Prid. Idus Martii. Etatis Anno 53. M.XI.D.VI.

Quod vero in nota subiecta pag. 309. Velle se, addit *Buderus*, ut de vitiis viri non tacuissent, qui de vita Cisneri quædam prodidere, videri posset legenti, multa de vitiis innotuisse auctori, qui tamen mox subjicit, nullum sibi inquirenti oblatum fuisse ne leve quidem indicium. Si ad errores & imperfectiones inquirendas extenditur curiositas, considerandum erit, neminem mortalium ab iis esse immunem.

edita Francofurti Anno M.DCXI. in 8vo. (22)
Summaria capita hujus Præfationis prolixæ sunt
hæc :

Quan-

- (22) 1. Opinionum discrepantiam in Jurisprudencia semper fuisse. De Sectis JCtorum apud Romanos. Opus esse, ut constituentur notæ certæ ad discernendas opiniones veras à vitiosis.
2. Comprehensio rerum alia est simplex & certa, alia multiplex & inconstans. Et quæ sensibus percipiuntur, usu confirmantur. Hujus generis sunt omnes disciplinæ practicæ.
3. Admînicula ad judicium formandum sunt disciplinæ cujusvis propria instrumenta, tum vero laudatissimorum in arte quacunque virorum exempla, & observatorum applicatio. Jurisconsulti posteriores Romani fuerunt Ecclésiastici.
4. & 5. Ejus rei in Jure Romano multa reperiuntur exempla, ex quibus aliqua recensentur.
6. Applicatio dictorum ad tempora nostra & varias Doctorum opiniones de ipso genere doctrinæ & interpretandi modo. Ubi de odio, quod concitarunt in se omnes, qui à via *Bartoli* ejusque affectarum abierunt.
7. Causa odii, quod crederetur literarum humaniorum studia obesse Juris Civilis scientiæ, vel quod metuerent plerique detrimentum suæ existimationis. Alii tenebantur præjudicio auctoritatis.
8. Causæ, quibus moti alii, neglectis illis, ad Jus Justinianæum interpretandum Studio Philologico dederunt operam.

9. Ra-



Quandoquidem vero per ea quæ supra sunt dicta,
simulatæ Philosophiæ species sint variæ, nobis tamen
eam.

9. Ratio docendi & interpretandi Jurisconsultorum veterum,
ex quorum Libris Pandectæ compositz.
10. Prætulisse eos Justitiæ & æquitatis rationem stricto Juri.
Probatur testimonio Ciceronis. Studio autem Juris Ci-
vilis veteres junxerunt etiam alias disciplinas isti cognat-
as.
11. Refellitur opinio eorum, qui putant, non posse conse-
qui laudem JCTi egregii, qui aliis liberalibus discipli-
nis operam dederit. Primo exemplis veterum Romano-
rum.
12. Secundo, exemplis auctorum omnium, ex quorum
scriptis opus Pandectarum fuit compositum.
13. Ingressus ad comparisonem recentiorum JCTorum cum
antiquis.
14. Proprietatem verborum, quæ ad Jus pertinent, Juri-
peritis magis esse prospectam, quam Grammaticis,
etiam nobilioribus. Exemplis hoc declaratur. Et de
usu Titulorum, *de Verborum Significat. & de Regulis
Juris.*
15. Artificiofam tractandi Juris rationem per compositio-
nem, partitionem & dissolutionem esse quidem Dialecti-
corum magis, quam JCTorum. Eam tamen multum
utilitatis adferre ad Juris disciplinam. Non tamen ideo
omnem dialecticum Jus civile explicare posse, nisi in eo
ante sit eruditus. Sic quoque Jus est ars boni & æqui.
Non tamen qui Juris Civilis peritus, idem protinus est Ehi-
cus & Philosophus. Optandum tamen ne hæ disciplinæ
cognitione sibi junctæ dissociarentur.
16. Diffe-

cam tantum deformare est animus, quam nominavi-
mus loco ultimo, tanquam specie sua maxime splen-
den-

16. Differunt inter se Philosophi & Juri tractandi modo.
Hoc explicatur per partes, concludendo, quinam Ju-
risconsulti maximam cum veteribus habeant similitudi-
nem.
17. Interpretandi ratio veteribus familiaris fuit in dexteritate
formandi genera ex speciebus tam diffusis, & resolvendi
ea in suas species, adhibitis ubicunque definitionibus.
18. Justinianus in compilatione Juris sui, quod perfectissi-
mum credidit atque ostentavit, hanc methodum maxime
necessariam non observavit. Et Pandectarum nomen Dige-
storum vix merentur. Unde non mirum, dari ibi-
dem tam multas antinomias: in cujus rei argumentum
exempla nonnulla allegantur, *Irnerii, Azonis, Accursii*,
aliorumque Interpretum, qui post Justinianum concilia-
re ejusmodi controversias tentarunt, inter se ipsos acrem
quandoque controversiam moventes.
19. Orta hinc copia Commentariorum innumerabilis, ipsum
Jus reddidit perturbatum. Postea vero reslorescentibus
litteris Juris doctrina obtinuit lucem meliorem, & expo-
nitur Jurisconsultorum presentis ævi differentia. Optima
quæque seligenda sunt. Idem fecit *Duarenus*, alique.
Necesse est ut cum cognitione Juris usum jungamus.
Ob inveteratum, licet depravatum Judiciorum morem
legendi sunt Juris studiosis Interpretes.
20. Auctoris cogitationes de Jurisprudentiæ & Forensis Pra-
xeos studio in meliorem formam redigendo. Cujus ver-
ba sunt sequentia:

*Ac mihi quidem ea de re diu multumque in hac summi hujus Tribunalis luce
cogitanti, nulla melior ratio ejus corrigendæ, in mentem venit, quam
si aut*



dentem peramnatam à plurimis. Non est hodie de-
 mum nata hæc descriptio, sed à pluribus annis per
 otium

si aut veteris Juris ac Justiniani conjunctū antiqui cujunque generis de
 eodem genere, cum aequitate congruentibus, Legibus municipalibus pri-
 stina simplicitas restituatur, aut si id fieri his nostris moribus non possit,
 tamen ad illam formam, quam proxime Judiciorum ritum, usuque so-
 rensis revocetur, eodem instituto, quod C. Julio Casari & Justiniano
 propositum fuit, ut Legum multitudine concisa, ex infinito finitum, ex
 confuso continuum, ex incerto certum, ex obscuro perspicuum redderent.
 Horum alterum si fiat, non modo persuasum habeo, sed ex multis justis
 argumentis & verosimilibus rationibus, quasi pro certo statuo, nec im-
 mortales, innumerabilesque lites, nec inexplicabiles controversias stro-
 phique & antistrophis fallacium hominum maxime callidorum patrono-
 rum, & vistorum causidicorum intricas nos habituros. Unde enim
 illa artes proclandarum litium, exceptionum, & dilationum remora
 his postremis seculis, & inventa & coacervata sunt? Quare nisi harum
 versutiarum radix precipitatur, timendum est, ne hæc Jurisprudencia præ-
 dica, ususque forensis, cum maximo & rerum publicarum malo & li-
 gatorum detrimento in meram convertatur sophisticam, præsertim
 cum videamus multos hodie hac veræ Philosophiæ professione abutentes,
 & sanctissimam disciplinam pecunie cupiditate polluentes, majorem ra-
 tionem quaestus, quam honestatis, privatorum commodorum, quam
 communis utilitatis habere. Est enim, ut magnas opes ex miserorum
 clientum sudore & sanguine consequantur, procliviores sunt ad lites pro-
 trahendas, quam finiendas, cautelarum versutarum, & artium aucu-
 piorumque forensium studiosiores, quam Justitiæ æquique & boni. Ita-
 que qui ita sunt affecti, quandoquidem contra boni viri officium faciunt,
 veteratores, litiū concinnatores, rabula, moratores, sophista, non
 Justitiæ Sacerdotes, æquitatis patroni Juris vel prudentes, vel consulti,
 quia iidem viri boni societatis humana cupidi, Reipublicæ studiosi, &
 communis tranquillitatis, ac quietis, societatis humana amantes sint ne-
 cesse est. Sed quorsum me cogitatio de moribus nostrorum pragmatico-
 rum provexit? Ut igitur ad institutum nostrum redeam, quo in nu-
 mero Duareni nostri scripta sint ducenda, ex iisdem illis formulis satis
 aperte perspicui potest. Nam quia pro temporum horum ratione, luce
 Justinianæ regulationi opus esse intelligebat: majorem operam in Com-
 menta-

otium conscripta , typis fortuito vulgata , exosa tunc
iis qui forte sibi male conscii fuerunt , multis tamen
accepra , jam dudum repetendo typo desiderata.

En igitur editionem veste nova indutam, emenda-
tam passim, additis etiam hinc inde suppetitiis. Scopus
fuit Auctoris, monendi omnes qui Jurisprudentiæ ope-
ram dare & in eo vitam agere , officiumve aliquod
digne obire cupiunt , ne illotis ut ajunt manibus ad
eam accedant , veramque non simulatam Philoso-
phiam adquirere summa ope & alacriter annitan-
tur.

*mentariū suū dedit : ut priorem regulam observaret, veterum Juris au-
thorum similitudinem imitatione assequeretur , quam ut Justiniani pra-
scripto pateret. Itaque eorum & perspicuitatem & simplicitatem & fa-
cilitatem , ordinemque & rationem in rerum tractatione , & in boni
atque aequi disputatione & disjudicatione consecutus est. At in parti-
tionibus methodicis , titulorumque expositionibus se ad posteriorem illam
formulam , ad Justiniani Ediſſa de Paratitulis , & quāvis mōda interpreta-
tione retulit , quanquam uberius pleniusque hac genera se persequutus.
Summas sane primorum illorum ab instaurato Jure Justiniano in enar-
rationibus illis suis & genere , & sermonis puritate , & artificio tracta-
tionis , & præstantia Judicii superavit.*



APHO.



APHORISMUS I.



On est novum , res valde utiles & maxime necessarias , quia ubivis obvix , contemptui haberi & pedibus conculcari. Idem fere accidit *Schlendriano*. Quotusquisque enim est , qui audito nomine , sibi non imaginetur rem aliquam pervulgarem , ad artes illiberales potius quam ad studium sapientiæ pertinentem ? Et tamen si recte incas rationem , nihil reperietur utilius quam ut familiarem tibi reddas *Schlendrianum* : Nulla ad societatem inter homines tuendam , locumque aliquem in ea cum honore obtinendum via facilior , quam isto duce magistro. Aqua & ignis in pretio non habentur inter homines : non potest tamen absque iis vita hominum sustentari. Hinc gravissima fuit olim poena aquæ & ignis interdictio. Simili fere ratione in vita civili , ab omni officio gerendo exclusum putares , qui à *Schlendriani* usu prohiberetur. Hic enim est , qui aptos reddit homines ad officia publica , Ecclesiastica , Politica , Aulica , Forensia , Academica , & reliqua. Modica prudentia regi mundum , dudum existi-

stimavere Philosophi. Hanc prudentiam docet *Schlendrianus*. Quemadmodum ergo animi ingrati foret indicium, si quod quisque beneficio *Schlendriani* adeptus est, ei acceptum referre erubuerit; Ita rem invidiæ plenam saperet, si quis doctrina ejus cupidam praxeos forensis juventutem impertiri noller. Dandum ergo honori Magistri, ut à contemtionem, quantum fieri potest, liberetur, ostendendo paucis doctrinam ejus esse cum utilissimam, tum facilissimam, usumque frequentissimum. Quam proinde summa ope & alacri studio juvenes accipiant, pulcherrima sese oblectantes specula, posse etiam ipsos, his præceptis gnæviter eruditos, ad officia in Republica sibi credenda, faciliori negotio adspirare, suasque in ea partes feliciter explere.

APHORISMUS II.

Inter causas evalescentis existimationis *Schlendriani* credo esse etiam nominis originem, quam putant, probabiliter quidem, à voce *Schlendern* descendere. Id equidem certum est, Germanicam Linguam substantiva, quæ in *ian* exeunt, non habere, vid. Schottelii *Opus de Lingua German. Lib. II. Cap. XI. Von der Ableitung* / adeoque adscititiani esse terminationem in *ian*, nam promiscue dicitur *Schlender* & *Schlendrian*, & terminatio in *ian* facta est ad imitationem vocis *Grobian*, vel *Plumprian*: verum id in contem-



temtum Schlendriani accidisse puto : Et usum vocis *Schlendern* abjectum nimis esse crediderim , quam ut habenda sit pro origine celebris nostri *Schlendriani*. Nam usus popularis est talis , ut indicet incesum hominis incurium , non satis attenti ad causam suæ ambulationis. Hinc dicunt , *er schlendert so mit* , de homine non magnâ industriâ , qui per imperitiam contentus est qualitercunque res à se gerantur , modo aliquo possit esse numero , imitando aliorum agendi , loquendi , scribendiqué modos externos , ita ut inter ceteros numeretur magis , quam habeatur ex iis , qui ad nominis celebritatem aspirare queat. Absit ut putes , amice Lector , me hic descripsisse *Schlendrianum*. Majorem honorem deberi ei credas velim. *Schlendern* & *schlenkern* sunt verba valde affinia , sicuti phrasés *Schlendern gehen* : & *Schlenkern gehen* : Ambæ nihil magnifici prædicantes , sed nihil ad *Schlendrianum* pettinentes. Miror , quod contemtores non etiam affinitatem statuunt cum voce *Schlaudern* , quæ dicitur de iis , qui agunt dissolutæ , vel cum voce *Schäkern* , quæ indicat gesticulationes ebriorum more lascivientes : est enim ab Hebræo vocabulo *Schäcker* , quod significat ebrium. Populariter usurpatur de iis , qui asinorum vel juvencorum more petulanter colluctantur. Si quis formaret substantiva *Schlenkrian* , *Schlaudrian* , *Schakrian* , per me liceret , modo fiat sine detrimento nostri *Schlendriani*.

Sp̄reta itaque origine à voce *Schlendern*, putarem derivandam esse vocem *Schlendrian* à primitivo germanico *Schlau*; Quod denotat sollicitum & providum, vide *des Spaten*. (*Stilero* erat nomen isti viro celebri & in excolenda Lingua vernacula admodum versato) *Teutschen Sprach*. *Schlaß* voce *Schlendern*; quam ille etiam deducit à voce *Schlau*; quod suo loco relinquo, sed *Schlendrianum* omnino à *Schlau* derivari existimo. Id enim cum significatione optime convenit. Non vero cum isto Auctore facio, quod *Schlendrianum* dicat ibidem hominem indoctum, inertem, & extendi, ait, vocem *Schlendriani* ad Notarios (omni- sit Auct̄or reliquos forenses Practicos) imperitos, inscios, quos vulgo *Formularios* & *Formularistas* appellant. Hic enim vocabuli usus cum origine *Schlau* minime convenit: contraria enim sunt, caute agere & sollicite, & agere negligenter atque imperite: Nimirum virtutis est, etiam defectus suos obtegere. Itaque si quis imperitiam suam pallio *Schlendriani* velare scit, ita ut pro Philosopho nihilominus habeatur: quis dubitet hunc ceu hominem cautum, callidum, providum, in honore & existimatione futurum. Talis ergo erit verus & bonus *Schlendrianus*.

Ceterum pace venerabilis Prisciani uti licebit voce *Schlendriani*: Sermonis venustatem & laudamus & sc̄clamur libenter, cedendum tamen est tempori in quo barbarismi & solœcismi turpitudini non ducuntur, & unus-



unusquisque, nescio cujus scholæ discipulus, sufficere credit, si quomòdocunque animi sui sensa, audacibus etiam verborum figmentis, proferat, ab altero tamen, cui loquitur, licet ægre satis, intelligi possit. Equidem orationis cultus à reliquis disciplinis adeo non abhorret, ut potius vulgi opinionem, non esse cum foro sociabiles literas humaniores, magno animo damnaverit summus Jurisprudentiæ cultor *H. Grotius Epist. ad Thuanum, & Aubertum Maurerium*. * Nisi enim studiorum & orationis elegantia emolliatur reliquarum disciplinarum asperitas, parum sane habent jucunditatis & labori facile succrescit tædium. Non abnuimus defendi posse causas sine eloquentia, & vulgo ita fieri experimur, si tamen claritate & nitore sermonis illustretur causæ justitia & defendatur, potentius longe, etiam Lactantio judice, *Lib. I. de falsa Relig.* influet in animos, & vi sua instructa, & luce orationis ornata. Ornatum dico, non eum, qui in flosculis translationum contortaque constructione à nonnullis ineptè quæritur, sed qui consistit in sermonis & puritate & perspicuitate: Orationis, in quam, fluxu, themati accommodato, qui sit neque infra rem, neque supra rem, utor verbis Plinii *Lib. I. Epist. XX.* Cum non minus non servet modum qui adstrictius dicit, quam qui effusius. In rebus quæ ad corporis cultum spectant squalorem devi-

* In Collectione Epistolarum ad Gallos scorsim edita pæna à Georgio Schubarto Epist. 8. & 16.

devitare solemus. Cur non eandem curam habeamus sermonis, qui mentem hominis, totumque ejus ingenium exprimit.

Sed quorsum hæc? inquit, Schlendrianus. Abducti vero fuimus contemplatione inertiae multorum, qui festinata spe forensis praxeos licentiam sibi sumunt omnem in usu sermonis latini, ut putares sæpius epistolas obscurorum virorum te legere, vel Apuleji asinum rudentem audire, verendumque sit prolatum iri aliquando ab istiusmodi fori practicis multiloquis, gloriosis, insulsis, nescio quæ *cicilendra*, *polindra*, *hapalopsides*, *sancaptides* aliaque nugacissima, exemplo coqui Plautini, qui hominum avaritia dicebat se factum improbiorem, non suopte ingenio *Pseudol. act. 3. scen. 2.* Ita hi imperitia stultitiaque hominum, non suopte ingenio dicturi sunt bardos se esse redditos, ut fastidiant Hadrianos & Bembo Cardinales, Muretos, Balbinos, Schoros, Cellarios, aliosque recentioris ætatis, qui post priscos eloquentiæ magistros elegantiam latini sermonis juxta puritatem tradiderunt cōservaruntque. Profecto nihil attinere ad se hæc omnia credit Schlendrianus. Is enim officina humaniorum literarum uspiam inspectâ, apparatus istius præstantiam laudat, absque rubore enim id non facere non potest, ejus tamen acquirendi curam aliis, quibus magis esse otii putat, relinquit. Adeo delicato palato esse non expedit. Dicant alii & scribant *manuactorie*, pro palpabiliter, *factum*



*factum furcibile , patibulare , pro , furca dignum , adversarii intentionem conclavare , pro , impedire vel elidere , Supplica indecreta , pro , non expedita , infinitasque alias effingant , ausu infelici , loquendi sartagines , an quid etiam amplius ? Gratulatur sibi Schlendrianus de locutione nova , quam ad imitationem illico refert . Commoditatem amat , istam vero verborum crucem devitandam esse . Quis enim hanc scholarum anxietatem dudum derelictam sectaretur , dum ad negotia graviora animus est adplicandus . Cum Wezlaræ accessus mihi daretur ad scrinia & libellos celebris cujusdam Procuratoris , cui Leodienses causæ præcipuè erant commendatæ , admirationem subiit stylus latinus plerorumque Advocatorum incultissimus , (de omnibus affirmare religio est , sunt enim Leodii etiam Jcti & Advocati eximii , laude dignissimi , paucissimi tamen inter sexcentos) ut in mentem venerit , ob solam barbariem sermonis impeditiorem esse causarum istarum unam , quam ex Germanicis plures , ceteris paribus . Desii autem mirari , certior redditus , ipsam in scribendo indiligentiam non minus nutriri quam stylum curatiorem . Neque etiam huic majorem haberi honorem . Solenne esse Leodiensibus ex gallicis vocabulis facere latina spuria , ex. gr. *intertenerè familiam* , & similia innumera , adeo ut si auditores essent Actorum judicialium *Manutii & Cellarii* medicina ipsis opus foret ad cohibendum vomitum.*

(D)

tum.

tum. * Si quis diceret : isti homines latine non loquuntur : paratam fore responſionem : imo vero tantum loquuntur quantum eſt ſatis ad intelligendum voluntatem. ** Quis ergo non ſequatur viam faciliorem , miſſa illa nimia & miſera diligentia.

Utilitatem rei oſtendimus : quin igitur & vocem toleremus in civitate latina. Sane commodiori non poterat exprimi *Sollicita rerum externarum in officio quocunque publico obſervandarum , in verbis , formulis & geſtibus imitatio , ad locum qualitercunque ſuſtinendum utilis , doctrina tamen ſolidioris adjumento non inſtructa* , quam per vocem *Schlendriani*. Dico *imitationem ſollicitam* , hoc enim prædicato diſtinguitur *Schlendrianus* ab imitatione negligenti & diſſoluta. Alius certè eſt clamor graculi alius luſciniaæ cantus. Talem imitationem *Schlendrianum* qui vocaret , honori ejus multum detraheret. Addidi : *non eſſe inſtructam doctrina ſolidioris adjumento* , hanc enim *Schlendrianus* tanquam rem neceſſariam ad officium gerendum tantopere non curat , laudat quidem , ſed faciliori curſu eandem lauream acquirere ſe poſſe confidit.

APHO-

* Vid. Thomafii *Præfat. ad Orationes Academicas* , editas Anno 1723.

** Cicero *Orat. pro Cæinna* , Edit. Freigii , Tom. I. pag. 741.



APHORISMUS III.

Quemadmodum vero hominum plerorumque ingenia ad exemplum Platonis Philosophi comparata non sunt, ut esse, quam videri malint boni, sed inverso ordine, videri malunt plurimi, quam esse periti & prudentes. Ita deridendi merito erunt, qui *Schlendriano* bene uti non sciunt, arripientes quæcunque audiunt & legunt, atque in exemplum trahunt, ipso *Schlendriano* ineptiores. Cum ita deberent uti, ut solida rerum cognitione destituti (nam qui hanc possident *Schlendriani* solatio opus non habent) imperitiam suam obtegant, & caute Magistrum suum in auxilium vocent. Qui incauti sunt, & incitiam produnt, hos *Schlandrianos* potius quam *Schlendrianos* appellare oportebit. *Schlendrianus* verus sollicitudinem habet, ut sub specie *styli Curia* sese in altum erigere sciat, & si nonnunquam ei detrahatur larva, cumprimis ab iis penes quos solidior doctrina est atque experientia, rursus cum cautione debita submittat caput. Qui male eo utitur, & pro vera sapientia aut doctrina coram doctis audet venditare, statim suam prodit inertiam.

Verum ut ad fines suos redigatur *Schlendrianus*, dicendum est qui distet à *Stylo*. Stylus ad consuetudinem pertinent. Hæc ex diuturnis moribus, consensu utentium, cumprimis vero superiorum, comprobatis, nascitur. Pari ratione fit *stylus*. Magis tamen ab usu

superiorum quam inferiorum derivandus. Nam quæ inferiores agere consuevere, fiunt sæpius contra Leges, talia quoque *styli* nomine, sed perperam, venduntur. Fundamento igitur certo nititur *stylus*, habetque suam rationem. Hinc & legem imitatur. Non loquor de *stylo* in *Titulis* honorum, quem nonnunquam plumbeum imo cereum esse factum ostendit Eybenius *Dissertat. de Stylo Curia*, sed generaliter de modo agendi externo in quocunque officio publico, lege expressa non præscripto vel approbato. Certe stylum suum habent officia Ecclesiastica, Aulica, Forensia, Academica. Habent quoque suum *Schlendrianum*. Schlendrianus imitatur saltem stylum, & quandoque, ut ait Cicero, claudi more pilam tenet. Non à moribus approbatis procedit, sed ab imitatione aliorum, quam si quis sciat facere caute & cum cura, toleratur inter ceteros, si vero negligenter, mulctandus erit, non quia *Schlendrianum* secutus, sed quia male eo est usus: Præscripta legum tenere, hoc ad *stylum* non pertinet, multo minus ad *Schlendrianum*. In legum externa adplicatione, Magister *Schlendrianus* de vi & potestate legum parum instructus, aliquid sibi sumit.

Exemplo forensi res declarari potest. Quæ sint requisita libelli pro impetrandis appellationis Processibus, legibus est præscriptum. Has leges recte ad facti & personarum circumstantias adplicare, & libel-



libellum bene componere, prudentis est Advocati. *Schlendrianus* prudentia efformandi suo Marte scriptum destituitur, hinc ad formulas remittit, quas si quis seligere, & mutatis mutandis, libellum petitorium, quem supplicationem vocant, bene consarcinare sciat, ita ut futuræ non appareant, potest haberi pro perito, quousque defectus interni obteati maneant. Si vero quis formula undiquaque arrepta utatur, &, quod fit sæpenumero, (etiam in supremis Judiciis, si Procuratores amanuensibus suis curam hanc committunt, quando ipsis commodum non est, ut relegant & emendent. Relatum refero à commilitonibus in familiaribus Colloquiis cum Wezlaræ essem) male ad circumstantias facti accommodent, tales credo ab ipso *Schlendriano* vapulatuuros esse, quod Magistro non didicerint uti cautius.

Aliud exemplum Ecclesiasticum. Nihil frequentius quam usus Librorum qui comprehendunt Homilias sacras. (Libros tales vocant Postillas, à dicto antiquorum: Legantur Evangelia, *post illa* Homiliæ.) Quod, si quis satis instructum semetipsum crediderit, si ex homiliis pluribus aliam componere sciat, poterit forte populariter pro bono Ministro Ecclesiæ haberi. Si vero quotannis eadem chorda oberret, vel nonnisi conscriptas aliquot orationes habeat, quas cujusvis anni vel trienni decursu in concione declamet, huncce

Schlendrianum inertem mox deprehendunt etiam non literati & despiciunt.

APHORISMUS IV.

Regnat scilicet *Schlendrianus* in Ecclesiasticis officiis & Politicis, Aulicis, Forensibus, Academicis, & ubi non? Sufficere enim ut faciat quis qualitercunque officium suum, reliqua à fortuna dependere, plerique credunt. Et comprobatur rei veritatem atque commoditatem experientia quotidiana. Didicisti non-nihil latini sermonis: annum forte egisti in Academia: ad compendii alicujus Theologici expositionem adnumeratus fuisti: ex homiliis vel impressis vel conscriptis construere orationem sacram & memoriae mandare consuevisti: Nihil deesse tibi puta ad Officium Ministerii in mediocri loco obtinendum, quam favor eorum qui jus vocandi habent. Si aliquid ex Græca lingua & Hæbrea didiceris, & flosculos Rhetoricos vel etiam Poëticos, & Lemmata dudum decantata intermiscere: tunc sane existimationem præclaræ eruditionis ambies, & obtinebis, ab iis scilicet qui meliora nesciunt. Si inveniatur qui *Schlendriano* detrachere pallium audeat: qui forte dicet: Tu nil nisi vox es: tu barba & pallio tuo confusus, supercilium erige, in eum, ceu contemtorem officii, publicè invchere, & si per inscitiam tuam licet, ad palinodiam adige: si recuset, clamita hæresin. Animadvertes utiliter, *Schlendria-*



drianum tuum regnaturum. Sed cave ab iis qui sunt te doctiores, nam accipieris pro merito. Ad *Schlendrianicos* Ecclesiasticos accedunt quidem, sed cum existimationis popularis nota meliore, qui credunt præclarè se officio fungi & coetui prodesse, si compositis ad artis Rhetoricæ præcepta sermonibus, additis suoque ingenio flosculis emblematum & lemmatum, eloquentiam suam ostendent. Quasi vere oratio sacra si istiusmodi elegantis careret, vi suâ & scopo excideret. Meminisse oportet verborum sapientiæ divinæ Magistri summi *Matth. XIII. vers. 52.* junct. *Luc. VI. vers. 44. 45.* Itali oratores sacri, nisi in suggestu; qui ad modum ambulacri factus est, decursitent, gestus & motus faciei, manuum & totius corporis violentos atque contortos orationi addant, non habentur pro bonis homiletis. Tu ergo ut in numero esse & haberi possis, imitaberis Schlendrianum Romanum si fueris Romæ, si alibi, sicut ibi. Gestus & elocutio vim orationi addunt. Oratio etiam optime composita sine elocutione & gestu frigeat, & putares statum loqui non hominem. Si tamen ex duobus extremis unum eligendum esset, mallet ego audire statum verba sacra ex bono thesauro cordis sui proferentem, quam hominem qui tanto cum corporis & vocis motu eloquitur orationem, ut insanire eum, vel histrionem agere putaturus sit, qui rei non est assuetus. Sed meum non est consilium Schlendrianismos

mos sacri ordinis hic depingere & Anagyrim commovere, factum id satis in Erasmi *Encomio Moria*, & novissime in *Charlataneria Eruditorum*.

APHORISMUS V.

Dicam potius de Schlendriano Politico. In Principum Aulis quoque Schlendrianismum regnare experientia docet. Mutatur autem ejusdem forma mutatis personis. Et sicut Aularum vicissitudines sunt frequentiores, ita & *Schlendriani*, qui regitur ad exemplum, mores, inclinationes Principis vel Magnatum. Igitur si noveris componere tuum corporis habitum, tua verba, tuosque gestus, ad indolem in Aula regnantem, reliqua à fortuna expecta. Memini viri cujusdam aulici, qui, licet ad officium Præfecti superioris se minime sufficientem ipse agnosceret, tamen postulare non erubescibat, quia si dignus esset, deberi sibi ajebat ex merito, sed se sperare à gratia Principis. Tunc vero fore gratiam, si officium conferretur ei qui dignus non esset, Schlendrianum facile addisci posse. Neque fuit inutilis ei hæc Philosophia. Vidimus alibi sæpius morem per varios gestus & motus corporis quasi ad numerum & mensuram distinctos sese inclinandi, si Princeps in prandio accumbenti secum, propinaret. Qui hos gestus probe sciebat imitari, cæteraque quæ in Aulis usu veniunt peragere, cum venerationis externa demonstratione, atque, ut ait Comi-



Comicus, *utcumque in alto ventus est, exin vela vertere*, is pro expertissimo aulico habebatur juxta illius temporis praxin. Equidem omnis morum & exteriorum actuum imitatio non est *Schlendrianus*. Nam & prudentiores externis rebus sese conformant, sed cum moderamine & sine affectatione, observantes ea ratione *Decorum politicum*. Est enim hoc, ex definitione celebris nostri temporis & JCi & Philosophi, *Imitatio rationalis ex virtute complacentia orta, hominum nostri Status qui pro praeipuis aut praestantissimis haberi solent, in actionibus quae non repugnant regulis universalibus honesti, justis & decori*. Prudentia summa Aulica est injurias tolerare & gratias agere. Qui hoc sciunt, viri sunt prudentissimi. Injuria non cadit in virum sapientem, dictum est Senecæ in Libro *de Constantia sapientis*. *Schlendriani* accipiunt injurias facile. Gloriam in imitatione sollicita quidem, sed sine doctrinae adjumento, ponunt. Si caute fiat, tolerantur, si inepte, periculum existimationis mox experiuntur. *Schlendrianica* imitatio oritur non ex virtute complacentiae, sed ex defectu doctrinae solidioris, & opinione, quod ad officium gerendum ea tantopere non indigeat. Dantur officia politica, etiam eminentiora, quibus fungi potest laudabiliter, qui noverit observare solennia moresque externos, vultum, ubi opus, ad gravitatem componere, scientiam negotiorum simulare, ignorantiam diligenter & callide regere,

(E)

gere, reliqua ex præscriptis sibi verbis agere. Hos in prudentum numero habendos nemo dubitat. Qui vero ad munus tale obeundum sufficere existimat qualemcumque rituum notitiam, & gratiam voluntatemque Domini à quo præficitur, is certe, cum doctrinæ solidioris inopia mox palam fiat, in externis etiam facile peccabit, & quod Schlendriano magistro usus non fuerit, tardius quam expediverat, dolebit.

In forensi praxi *Schlendrianus* omnem paginam facere creditur. Factus es dupondius in Academia, vel, si mavis, Justinianus novus, posthac titulum Licentiati vel Doctoris periculo tuo retulisti, formularios Auctores leviter inspexisti, ad summum, Advocati cujusdam celebris scrinia adire, & *bona mixta malis* inspicere licuit tibi, postulabis & flagitabis ut ad numerum recipiaris. Sufficere credes producere specimen qualemcumque Academicum pro summis in utroque Jure honoribus consequendis, etiam ab alio, si ipse non audes, elaboratum, vel Theses abs te collectas, aut thema consarcinatum. Temporis penuria dabit tibi excusationem. Nam *L. 11. Cod. de Advoc. divers. judicior.* quæ testimonia jurata peritiæ juris requirit, dudum abiit in desuetudinem. Neque meminerunt Dicaasteria suprema semper in recipiendis Advocatis moniti saluberrimi Meviani *part. 1. decis. 189.* Ut ergo recipiaris in Advocatorum numerum, fortunæ esse beneficium puta, non doctrinæ meritum.

APHO-



APHORISMUS VI.

Schlendrianum forensem dico , qui in imitatione externarum formularum , cauta tamen & sollicita , consistit , ita ut defectus doctrinæ ceu internæ qualitatis , quantum fieri potest occultetur. Inepti sunt , non *Schlendriani* , qui hoc nesciunt. Si imperitiam excusare velint , doctiores non audire , ad asinorum gregem dimittendi. Regnat inquam *Schlendrianus* in foro tantopere , ut nisi quis audiat & *Schlendrianum* consulat in principio , nunquam evasurus sit practicus. Duo sunt præcipue , ait Erasmus in *Encomio Moria* , ad cognitionem rerum parandam obstacula , pudor , qui fumum offundit animo , & metus , qui ostenso periculo dehortatur adeundis facinoribus. Quem ita pudor afficit , ne forte à doctioribus corrigatur , vel metus , ne per imperitiam impingat , is ad forense officium nunquam erit aptus. Magnifice ab his liberabit *Schlendrianus*. Disce imitari formulas , generalia methodi præcepta , fac officium qualitercunque , in numerum aliquem relatus , non ejicies. Et sic *Schlendriano* tua præcipua accepta feres , cetera quæ abs te non dependent , fortunæ.

Adeo inquam necessarius est *Schlendrianus* , ut ne Judicum quidem omnium Personas exciperem. Quotus quisque enim est qui in exordio muneris methodum causas decidendi non tentaverit cognoscere ex

collectionibus Relationum publicè evulgatis, non dubitans fore ut in *Schlendrianum* peccasse credatur, si Relationem juxta capita illa generalia: Quæ *Actio instituta: An probata: An elisa: Quid pronuncian- dum:* non composuerit. Et sane, si ex forma externa, distributionis capitum & verbositate laus relationi deberetur, nihil facilius esse crederem quam Judicis officio fungi. Si & reliqua qualicunque modo sese habeant, si *Cardinalis Tusci Conclusiones*, si *Barbosa Axiomata* ad manus fuerint, si adhibita vulgata Juris Systemata: Laudem reportabit *Schlendrianus* tuus magis, quam si quis ex peregrinis variis, optimis etiam auctoribus, centonem excerptorum, ad rem nihil facientium consarcinaverit. Huic enim merito objicietur: *Hic non est locus, proin tu alium queras cui centones facias.* Ex *Epicid. Act. 3. scen. 4.* Reprehenditur merito genus referendi fluctuans, quod quasi nervis carens, huc & illuc dilabitur, non potest sententiam confirmare, neque sese viriliter expedire. Sunt Judicia, utinam multa non essent, in quibus ne quidem Actorum Relatio fit in scriptis, sed sermone aliquo prævio & perfunctorio recensetur factum, petitum, & exceptio, contestimque ad sententiam fit progressus. Accidunt hæc cum primis, ubi pauci sunt, quibus Justitiæ administratio est demandata. Ubi ab unius opinione reliqui dependent. Si non placeat litigantibus, licitum est appellare vel Leutationis remedio

dio uti, & tunc Acta ad Judicem superiorem vel ad Collegium Jctorum transmittuntur. Alibi Judex officium suum non nisi in citandis partibus & terminis præfigendis exercet, sententias, etiam levissimas, extraneis Jctis permittit. Quid facilius quam hunc addiscere *Schlendrianum*? Proinde, si ex iis, quæ plerumque fiunt æstimanda est rerum gerendarum ratio, ex judicibus vero plurimi, qui, si *Schlendrianum* callent, satis prudentes se esse existimant, & pro talibus habentur: Sequitur, quod *Schlendrianus* etiam in Judiciis & personis ipsorum judicum, suum habeat regnum. In Imperiali Camera aliter se rem habere relatum mihi fuit, cum Wetzlarix praxeos addiscendæ gratia versarer, rigidamque censuram subeundam esse Candidatis Assessoratus, accepi. Exigi quidem methodum externam, sed ab internis præcipue, doctrinâ puta & Judicio Referentis, cujus præcipuum signum dilucida facti enodatio, distincta status controversiæ constitutio, hujusque definitio, laudes attribui specimini, non à conglomeratis allegationibus, quæ, ubi ex facti circumstantiis res decidenda, quod sæpe accidit, inutiles sunt omnino. Non sane quidquid laboriosum & diffusum, idem protinus existimari quoque præclarum. Neminem hic, nisi doctrina solidiori instructus fuerit, periclitari velle, credibile est. Receptos vero ad Assessoratus officium à senioribus Collegiis in ceteris, quæ à Candidato non exiguntur, instrui, ut qui operam ad-

hibere velit, brevi regulas teneat, ad circumstantias
 occurrentes cum judicio adplicandas. Eum in finem
 miscere in Senatibus plerumque juniores cum senioribus,
 ut tanto facilius negotia expediantur. Nullum enim
 repertum esse qui hic non didicerit. Id quod, credo,
 in omnibus officiis celebrioribus usu venit. *Les affaires
 sont les hommes* ajunt gallici magistri. Verum est
 axioma, sed requiritur subjecti capacitas, doctrina &
 judicium. Experientia sedulaque observatio addit fir-
 mitatem & perfectionem.

APHORISMUS VII.

Satis dixi de Judicibus. Venio ad partes litigan-
 tes, præcipue causarum Patronos, nam apud hos præ-
 cipue dominatur *Schlendrianus*.

Qui vel pudore vel metu afficitur, ad postuland-
 um est inhabilis. Nam quæ Cicero monuit, eos qui
 optime dicunt, quique id facillime atque ornatissime
 facere possunt, tamen non nisi timide ad dicendum ac-
 cedere, *Lib. 1. de Oratore*, hoc cum reliquis ejus mo-
 nitis ad conciones Romanas antiquas pertinere existi-
 mandum est. Remedium securum est à *Schlendriano*.
 Truncum sane esse oporteret; qui qualitercunque in-
 tellectis circumstantiis, primam à secunda Instantia dis-
 cernere, formalia in legibus & interpretibus inculcata
 examinare, tum vero evoluta Auctore formulario,
 recensere aliquo modo factum, & interposito ad suum
 sensum



sensum medio concludendi, petitem aliquod efformare nesciret. Epistolam non erubescere, dixit idem priscæ eloquentiæ princeps, cum postularet satis invenecunde laudari à Luccejo *Historico v. lib. 5. Epist. 12.* Supplicam multo minus erubescere crediderim, nam relinquatur Judicis discretioni, an petito velit annuere. Levius hic est periculum, imo nullum. Ad multas commoditates conducit nunquam pudescere & nihil non audere. Hoc paucos mortalium intelligere scripsit in dicta Panegyri *Erasmus*. Si denegetur petitem, rursus instabit causæ Patronus, rationes denegati petiti divinare tentabit, & si audacior est, facundiæque aliqujus opinionem velut alter Antiphon apud Thucyd. *lib. 8. pag. m. 379.* adeptum se crediderit, cum iudice expostulabit, donec spes decollaverit omnis. Ecce *Schlendrianum* commodum & facilem, quo, qui scit uti caute, ne per imprudentiam in multam incurrat, laudem sui patrocini referre poterit egregiam & præmia ampla.

Quod si deficient vires, audacia certe

Laus erit: in magnis & voluisse sat est.

Omnis labor patronorum forensium sit initio, ut processus petiti obtineantur, quia hoc mandanti suo tunc temporis est utile. De eventu, nisi prematur ab adversario, ne sit anxius causæ patronus. Hæc cura relinquatur ei qui decisione magis opus habet. Ille interim sciet, si ita expedit, eam procrastina-



stinare. Fit hoc facili negotio si conspirent & Advocatus & Procurator. Hic sæpiusculè illius nutu regitur. Quid quæso facilius quam petere in principio prorogationes fatalium ad introducendam appellationem. Si causæ nullæ sunt in promptu, allega in posterum docendas: *Aus künfftig zu bescheinigenden Ursachen.* Exhibe tandem supplicam, & causare adjuncta omnia tibi non transmissa, mox producenda, interim fatalium prorogationem flagita. Satis temporis superest donec à Judice constringaris. In Libello appellationis, cum præfatione veniæ, *salvo honore*, Judicem priorem nulliter egisse & pronunciaſſe inculſa, gravamina accumula, quorum probatione ad obtinendos processus opus non habes. Scis enim ea in re scrupulositati non studere Judicem. De eventu tu non est responsurus. Si processus decreti, deliberabit Advocatus an expediat periculum litis in superiori Judicio maturando ingredi. Hinc, quousque id videbitur utile, vel donec nuncium insinuaturnum processus, qui etiam tuis studeat commodis, itineris ordo tangat, differatur processuum decretorum expeditio, de quibus tamen adversarius reddendus certior, ostentando, ut ajunt, in vitro oculo palladium, & transactionem insinuando, quam nonnunquam alter, etiam cum dispendio, novi processus ambagibus præfert. Monitus procurator de redimendis processibus causari poterit, verissime etiam, moram clientis in erogatione sum-
tuum.



tuum. Variæ hinc neque injustæ querelæ Cancellariæ, non esse adeo promptas redemptiones expeditionum, quam fuere decretorum & sententiarum flagitationes. Quodsi Judex inferior ad executionem suæ sententiæ progressurus insinuationem processus decreti extorserit, non deerunt aliæ causæ moram excusantes. Nuncius, qui insinuavit, non revertitur tempore debito, prospiciendum igitur ut petatur fatalis termini reproductionis prorogatio. Qua facta tandem, si expediat magis adversario, ut Actor vel Appellans distineatur, Advocato prudenti suis vicissim utendum cautelis. Expectabit proclama. Unius enim floreni solutione contumacia purgabitur, longe major vero erit temporis usura. Comparebit tandem citatus per Procuratorem, probe memor, facto proclamate sex dies juridicas, h. e. Audientiarum publicarum, relictas esse, usque dum adversus contumacem quidquam decernatur, sufficiet ergo si Procuratori mandatum detur, ut comparere queat in ultimâ, jubeaturque petere dilationem ad exceptiones, quas jam dudum in promptu habere oportebat, intra trium vel quatuor mensium spatium producendas, & has dilationes tam diu repetet, donec præscindatur ulterior dilatio per Judicem. Si dilationi petitiæ in Judicio ad excipiendum, duplicandum, vel aliud quod oporteret, agendum, adversarius contradicat, invehaturque in moras tuas, studiose ut ait collectas, non erubescas ex collectaneis phrasium, singulari

gulari elegantia & frequentia commendabilem, *ohn-
gestanden gegenheiligen ohngütigen Angebens*, vultu
composito, in continenti reponere, & petere termi-
num à Judice. Hæc omnia *Schlendrianus* docet, &
in usu esse didici, reprobato quidem à superioribus,
qui tamen sit impunitus plerumque: Tenendum tamen
inprimis axioma Schlendriani summum: *Agendum
caute, ut licet intelligantur artes, vindicare tamen
nequeant.* Si metuis in contumaciam aliquid decre-
tum iri, allega te scripsisse vel Principali vel Advocato,
*daß außer Zweifel aus wichtigen Ursachen die Ant-
wort unterblieben, und stelle weitere dilation Hoch-
richterlichem Arbitrio anheim.* Vel si urgeat tempus,
dic, te accepisse *die rechtliche Nothdurfft müsse erst
durchsehen und ad stylum eingerichtet werden: oder
daß etwas daran ermangele*, petendo saltem aliquot
dies, & sperando ex diebus menses futuros. Interim
curam scripti in ordinem redigendi, si opus, & per
tuam commoditatem non liceat, alii committe. Ecce
rursus elegantem eamque facilem doctrinam *Schlen-
driani.* Observavi harum rerum praxin in musæis
quorundam Dominorum Advocatorum & Procurato-
rum, quæ invisere mihi licuit, eam non fuisse inuti-
lem. Dubito tamen an eadem cautelæ alibi juvare
possint v. gr. in Judiciis Statuum Imperii Provinciali-
bus, ubi conveniunt Judices certis anni temporibus,
neque dilationes tales permittuntur. Alius ibidem erit
Schlen-



Schlendrianus qui ex cujusque loci praxi observandus cauto practico. Si es callidus, mox intelliges, & imitaberis. Sæpius audiivi Wezlarienses Dnos. Procuratores culpam in Advocos extraneos rejicere, qui morarum sint causæ. Et verum esse plerumque, credo. Hoc ipsum est tamen, quod *Schlendrianum* valde juvat, nam si fungi licet officio, agendo saltem ea quæ Advocatus jubet, facillimum est munus Procuratorium. Advocatus scribit: à sententia quadam Judicis inferioris interpositam appellationem, sed per negotia complura aliasve causas edi libellum appellationis intra fatalia non posse, jubet interim ut petas fatalium prorogationem. Tu de novæ causæ patrocínio lætus, trium linearum schedulam rogatoriam, sive supplicationem, fieri cura, in qua fatalia prorogari petatur. Et sufficit si tantum porrigatur scribæ Judicii, non opus esse puta expectare Decretum Judicis, cui de tuis petitionibus moratoriis raro aliquid constat. Hoc petatum, licet interim ab Advocato nihil perscribatur, sæpius itera, & observa ut nunquam tempus brevius petas, rarissime unius vel aliquot forte dierum. Menses duo vel plures in ore & calamo habere debes, addito semper, quo magis tempori prospicias, ulteriori spatio per modum additamenti: Duorum *vel* trium, trium *vel* quatuor, quatuor *vel* sex mensium. Puta enim parvi referre an adversarius aliquot mensium intervallo frustretur. Et sic salvando fatalium cursum, probe fun-

ctus es officio tuo. Si forte lapsus fueris, negligendo fatalium cursum, refugium est ad restitutionem in integrum perendam; ex clausula generali: Si qua mihi iusta causa videbitur. Judicem indulgentiorem spera, compella, fortiter & audacter simul insta. Interim non negliges Advocatum monere ut tandem necessaria ad introducendam appellationem tibi transmittat. Is si vult, suoapte studio maturabit. Si mora est utilior, mittet tibi libellum in quo facti narratio erit verbosissima & in circumstantiunculis diffusa, tum vero series gravaminum ad numerum quantum fieri potest, aucta: non quæ ex sententia ipsa resultant sua sponte, sed quæ catalogus gravaminum adversus sententias generalis, (percurrendum est istud caput Auctoris, quem ad manus habes) suggerit, & ad casum præsentem quoque modo sunt contorta. Nam eo facilius processus appellationis sperare licet, cum Judex in tanto volumine, aliquam saltem speciem gravaminis ad effectum appellationis habere, est crediturus: Examinatum iri omnia non metue, non enim fert temporis, plurimumque causarum quotidie occurrentium ratio. Adversarius Advocatus tanto majori labore habebit opus ad refutationem tui libelli, neque ei, ut vicissim aliquid mereatur, invidendum, interim appellans tuus temporis beneficio fruitur: Quandoque advocatus ne quidem mittit Procuratori omnia ad libellum necessaria. ex. gr. sententiam præcedentem ad quam sese refert cā
à qua

à qua appellatio interposita fuit, multa enim Advocato negotioso accidere possunt ut aliquid prætermittatur. Sicque Procurator causam habebit ulteriorem moram excusandi & culpa in Advocatum recidet. Salubri consilio itaque in aliquibus Judiciis constitutum, ut appellantes & ipsi & Advocati juramento calumniæ obstringantur priusquam appellatio admittatur. Verissimum enim est, moræ in decidendis causis primam & ultimam causam esse Advocatos. Quod jam dudum adversus diæterium : Spiræ spirare lites, non exspirare, observavit piissimus Jctus Casp. Zieglerus *Dissertat. Themat. III. Cap. 17. §. 6.* Non negaverim aliquando esse moram à parte Judicis. Sed si prolixitati Advocatorum limites poni possent, promptior à Judice foret, credo, decisio. Optandum itaque foret ut in supremis Judiciis præsentés essent & jurejurando obstricti causarum si non omnium plerarumque saltem, Advocati. Non dico eundem cujusque causæ Advocatum esse debere qui est Procurator, hoc enim in tanto litium numero foret impossibile. Sed memini me legere, quod antiquiori tempore qui Spiræ habuerit negotia, Spirenses Advocatum sibi putaverit esse utiliore. Fuisse enim Spirenses præ aliis celebriorés & exercitiores. Magnam equidem obtineri posse maturationem litium, si Advocati causarum essent judicio supremo ejusque legibus speciatim devincti, nemo non facile agnosceret. Sed hac rerum tempestate

frustra id speratur. Extranei etiam Advocati non vulgaris notæ sese existimant, & sunt inter eos veri Juris Consulti. Audaciter tamen multi supremorum Judiciorum styli peritos sese credunt, hinc cientes bonos dimittere nolunt. Minister itaque Advocati Procurator, proponit ea quæ vult ille. Excusatio illo, qui totius causæ est director.

Conclusionem causæ evitandi (quæ nisi semet ipsos impedirent mutuo litigantes, in gravissima etiam causa fieri posset intra triennium) non minores sunt cautelæ *Schlendrianica*. Ubi certus productorum numerus lege est præfinitus, uti in Camera Imperiali non licet ultra duplicam, vel in causis mandatorum S. C. ultra replicam progredi, & termini sunt legales plerumque trium Mensium: Imperitus foret *Schlendrianus*, qui ignoraret viam, triplicam vel duplicam etiam sine venia Judicis protrudendi. Allegabis nova ab adversario prolata: in protocollo non negliges ad supplicam pro venia triplicandi porrectam te referre, petendo ne quidquam statuatur donec ad acta fuerit admissa, & sic quam à Judice expectabas veniam, tibi ipsi præveniendi dabis. Defensionis favorem omnia sanare existima. Te non satis auditum clama. Si nondum es instructus ab Advocato, hujus mora, morbus, occupationes & nescio quæ excusationum nomina in protocollo alleganda, ad dilationem proficient. Moritur etiam Advocatus, vel quod frequentius, patro-



patrocinium vel vere vel fide renuntiavit , novus erat quærendus , hic ex magna chartarum mole informationem capere debet. Procurator si ad causam novus accedat , se pro informatione ex actis , (quam tamen Advocati esse operam agnoscit , sua enim perustratione protocolli potissimum absolvitur) tribus vel quatuor mensibus opus habere causatur. Et ita primum & ultimum studium *Schlendrianicum* est lucrum quærere temporis. Scis enim decisionem non semper maturari à Judice. Interim tu cum adversario procuratore , qui moræ tuæ contradicit ac si jamjam sententia instaret , strenue & loquaciter colluctaberis. Wetzlaræ Audientię publicæ adstare cuique licet. Ego non facile ullam neglexi. Et sæpius risum movit , cum audirem Procuratorem eundem , qui cum altero dilationis ergo bellum verbale habebat , mox in alia causa , imo eadem , simili modo ab altero excipi. Et sic mutuas fieri objectiones , mutuas vicissim condonationes.

Si scriptum aliquod quod tu putas tuo Principali obesse posse , post longas moras producitur , vel saltem Recessus prolixior paulo ad causæ merita nonnihil compositus , recitatur , *Schlendrianus* docet ut petas rejici ab actis , in eventum reserves responsionem. Ego mecum sæpius reputavi , hanc eventualem reservationem magis nocere , quam prodesse. Dicis gratia tantum peti rejectionem ab actis , cum , quid in meritis contineat , quod etiam responsione habeat opus , nulla
à Pro-

à Procureur faite sit inquisition. Juge si videbitur
 necessarium, tibi responſionem injunget. Vidi ego
 ſcripta in Muſæis Procuratorum concluſionis ergo pro-
 ducenda, cum relationem Actorum urgeri divineret
 Procurator, quibus præter ſcripti ipſius prolixitatem,
 magnus adjunctorum numerus erat additus. Quæ li-
 cet ad rem faciant nihil, tentare tamen licet periculo
 mulctæ, à Principali reſtituendæ. Interim impeditur
 referens, quia neceſſe habet farraginem iſtam perlu-
 ſtrare, & inutilia ab utilibus diſcernere. Procurator
 omnia rejicere poteſt in Advocatum, quia ipſius non
 eſt, ſexcentarum cauſarum merita ſcire, & habere
 enumerata. Scribendum tamen & Advocato vel Prin-
 cipali, ut te Procureur concepiſſis verbis de ſtatu rei
 informet, ne adeundo judicem & ſollicitando minus
 gnarus videaris cauſæ, cui patrocinaris. Ea, quæ tibi
 ſcribuntur, eloquere curatiſſimè. Quæ audis, obſer-
 va, &, quantum poteſ, informari ſtude, principali
 tuo renuncia, caute tamen, ne nomines vel accuſes
 quenkum. Sic adquies tibi dexteritatis opinionem,
 gloriamque tuæ ſollicitudinis tibi vindicare, & ſi bene
 res ceciderit, de palmario victorem monere non eru-
 beſces. Si eventus voto tuo non reſpondeat, veriſſimam
 ſimulque faciliſſimam habebis excuſationem, quod per te
 non ſteterit, honos tibi nihilo ſecius habebitur.

Dum fervet conflictus ante concluſionem, docet
Schlendrianus, ſæpius reſceſſus in tuis cauſis perorare, hoc
 enim

enim utile est non solum existimationi, sed etiam crumena. Nam omnia faciunt ad augendam summam liquidationis expensarum. Licet enim moderatio Judicis plerumque tantum besset, quandoque vix semissem relinquat, tamen adeo stolidus non eris, ut expectes honorarium post finitum processum. Neque hoc cliens bonus, si abs te velit rem suam curatius agi, patietur. Imo invenes litigantes faciles, praesertim universitates, qui tuae religioni summam praenumerando pro expensis concredient, de qua tu rationem es redditurus. Compensanda enim est, quantum fieri potest, inertia eorum, qui te relinquunt, neque negligenda occasio pinguior. Sapissime expensae compensantur per sententiam Judicis, tum vero poteris esse securus a moderatione tuarum rationum. Ex taxa laborum praescripta vivere, non est viri tuae conditionis, neque secta nostrorum temporum patitur. Sublatis studiorum praemiis etiam studia peritura, Suilius & Cosutianus censuere apud Tacit. *Annal. lib. XI.* cujus orationis integræ probe memento.

Sententiâ adversus tuum clientem latâ, suggerenda remedia commoda. Appellationem ubi fieri potest, Leutationem (remedium valde commodum etiam in aliis Imperii Judiciis quam Saxoniae Ducum, de cujus abusu Zieglerus loco supra dicto disserit) in Integrum Restitutionem, Revisionem. Remedium restitutionis est utilissimum, quia effectum judicari suspendit. Acta accumulari possunt, Judex aliis occupatio-

(G)

pationibus destinetur. Ex adjunctione plurium personarum pro dijudicandis meritis arrepti remedii, spem novam propositam sustenta. Si jurejurando calumniae opus est, *daß. weder ihr noch eure Principalen und deren Advocaten von jetzigem neuen Einbringen vorhero einige Wissenschaft gehabt*, Clausula adjecta: *Oder doch solches zu der Sache dienlich zu seyn nicht ver-
meynet*, conscientiam salvare putabis. Tandem, si ignarus, quid antea in actis fuerit deductum, offerre juramentum procuratorium erubescas, (quotusquisque enim est ex Procuratoribus, qui inter tot causas, quibus patrocinator, singularum merita scire possit: Advocati hoc est officium, non Procuratoris) observa cautelam *Schlendriani*, ut offeras, *si à Judice admit-
taris*. Eam tamen ægre à Judicio admitti compertum habeo. Tentare licet, si non succedit, providentia tua saltem ab opinione temere oblati juramenti te liberabit. Si cautiore es conscientia, causam licebit relinquere, & clientem palam deferere, invenietur forte alius facilior.

APHORISMUS VIII.

Petis à *Schlendriano* consilium ad acquirenda tibi multarum causarum patrocinia? Neque hic deerit magister. Cogita Virgilianum illud: *

*Tentanda via est qua me quoque possim
Tollere humo; victorque virum volitare per ora.*
Idcir-

* Georgic. lib. 3. vers. 8. seq.



Idcirco dabis operam ante omnia, ut adquires qualemcumque de te opinionem scientiæ, diligentiae & obsequiositatis. Hisce enim parabis tibi apud superiores aditum. Tum vero conciliabis tibi amicos qui te ceu virum talem commendent. Insignis erit in te virtus & commendabilis, si quidquid didiceris vel conjecturis assecutus fueris, non effutias nec scientem te simules. Plus scire, quam loqui, sapientiam esse, ex *Epidico* memento. Malè enim accipiuntur scioli & plus, quam decet, curiosi & garruli: Memento *Horatium dicti lib. 1. Epist.*

*Percunctatorem fugito nam garrulus idem est,
Nec retinent patula commissa fideliter aures.*

Invigila, quid rerum agatur in curia, qui processus petantur & decernantur, adversariae parti mox denuncia, tuum offer patrocinium, & mitte, quam in promptu habes typis impressam formulam mandati procuratorii.

Si observaveris, aliquem de tardiori progressu suæ causæ conqueri, patieris libenter, licet ipse non facias, (id enim honestas prohibet) ut in Mandatarium præsentem culpa referatur, quod vel nimium sit occupatus, vel curatius agere & flagitare judicem non soleat, vel aliud quid prætermiserit, &c. Si res eo deducta est, ut novo procuratore sibi opus esse crediderit, tibi que formulam mandati transmiserit subscriptam, tu eam monstrare priori procuratori, & in judi-

cio producere non erubescas. Ille enim ab isto cliente alias non satis bene honoratus, ut eo carere possit, renunciabit haut a grè suo mandato, *Will von der Sache abgestanden seyn.* Et sic venies tu in possessionem. Ubi tamen non negligendum, ut acceptes renunciationem, nam fieri potest ut Principalis etiam tui pertæsus, vel alia de causa priori Procuratori rursus aliquid agendum committat, & is acceptationem abs te non factam causatus patrociniū rursus occupet.

Initio nullam sperne, quæcunque causa tibi defendenda offeratur, diligentem potius te monstra in omnibus. Allaborandum enim, ut quacunque die Juridica publicè proponendum habeas aliquid.

In novitiatu tuo videaris semper magis, quam sis, occupator, & in contradicendo adversario tuo, ita ut ne faciliè quid sine responsione dimittas, promtus.

Ad multam dictatam frontem obduratam habere, nam tibi primo, vel soli, hoc non accidit, & si Principalis tuus te omissiorem nolit fieri, sua sponte te præstabit indemnem.

Ne tamen affectes primis annis tui officii multarum causarum patrocinia habere, non cuivis contingit hanc adire Corinthum, casus est rarior, & si nuditas tua fortè detegatur, vel circumstantiæ mutentur, existimatio tua mox periclitabitur, opportunitati est invigilandum, tenenda capillis in fronte occasio. Ne qui-

quidem nuncii negligendi , qui suo præconio in regionibus diffitis copiam causarum nonnullis conciliarunt. Tu vicissim eorum lavabis manus , processus decretos tibi amicis nunciis præ aliis insinuandos concredes , interim prorogatione fatalium ad plures menses tibi poterit consuli.

Collectanea tibi para ex formulis variis Recessuum , quibus pro re nata utaris , nam imitatione aliorum tu excusaberis , & *Schlendrianum* pro stylo commodè venditare poteris. Reproducendi formulas , & quæ ad exceptiones , replicationes , duplicationes producendas spectant , præscriptas habes. Ceteræ observantur facile , quibus non agentium , vel non parentium accusatur contumacia : Dilatationes postulantur : Petitio adversarii contradicatur : Scriptorum tardius justo productorum , vel epistolarum clientis , remotio ab actis petitur ; Et si quæ aliæ ad verborum contentiones pertinent.

Ubi majorem numerum causarum adquisiveris , tunc eas , quæ minus utiles videbuntur , aliis commendabis , qui tibi gratiam sunt habituri. Est etiam filius , est gener , cui consulendum.

Si officii tui ratio postulat ut pro cujusque judicii more certis diebus publicè compareas , vestitu distincto , prout fieri consuetum in Camera Imperiali quavis Audientia , tibi que id fuerit quandoque incommodum , mitte , quæ habes proponenda , Collegæ alii , cui fortè

gratum accedit, ut exurgere possit & audiri, cum hoc in causis suis accadat rarius. Tu verò, si nominis celebritatem aliquam acquisieris, (aliud enim decet novitios) tuæ vacabis commoditati. Trecentæ enim possunt colligi causæ, quibus absentia excusetur. Non satis commoda uteris valetudine vel aëris intemperiem metuis: Habes expediendos nuncios hac ipsa hora, qui expectare non possunt: Es occupatus laboribus, in quibus, si hoc ipso tempore seponeres, circuli tui admodum turbarentur: Invitatus es ad prandium, vel amicos invitasti: venit ad te hac ipsa hora aliquis ex tuis clientibus honoratioribus, cum quo communicandum: Est in ædibus opifex, cui distinctè monstrandum, quomodo res tibi necessaria sit perficienda, alioqui erraturus foret cum tuo dispendio & animi ægritudine. Vel dic, te, ut compareas publicè, dispositum non esse. Variandæ autem sunt excusationes, & memineris probè proximè præcedentium. Adjectâ excusationi clausulâ, quæ salutaris dicitur, vel saltem per voculam *Desuper* indicatâ, indulgentiam Judicis tibi promitte. Compertum non habeo, an ad examen deducantur excusationes, id sæpenumero audiui, in honore esse Procuratores, faciliè excusari, non in schola versari, sed in curia.

Præjudicia varia collige, licet certus non sis an ad tuum casum circumstantiæ quadrent, tu tamen divinabis & allegabis, opinionemque diligentis viri hac ratio-



ratione adquirere studebis : nullum ex tua allegatione nascitur tibi periculum.

Cave , ne honorarium in annos plures non solum succrescat : Monere non desine : Diligenter scribe : Omnis epistola ad rationes refertur : Per nuncios liberalitatem excita , cum primis tuam diligentiam lauda , & laudari jube , marsupium preme , maximè tempore eo , quo tua opera indiget Principalis. Omnia hæc dum incipias gravia sunt dumque ignores , ubi cognoveris , facilia. *

APHORISMUS IX.

Sed manum de tabula. Retinere debet aliqua pro suis arcanis Magister cautus : Si uti didiceris his , quæ tradita sunt , bene tamen , ne artes intelligantur , si utilitatem fueris expertus , si nomen aliquod adeptus , gratiam habe *Schlendriano*. Si observationi diligenti dederis operam & imitationi , plura doceberis tuo Marte , & novas cautelas *Schlendrianicas* invenire scies. Pugiles , si ictum , quem in animo habent , ab adversario motu contrario elisum iri sentiunt , novum solent confestim instruere. Ita tu , si artem unam non succedere intelligis , mox aliam in promptu habere debes. Interim ne commovearis , si his præceptis , quæ plurimum annorum observatione collecta sunt , hucusque ad secretiorem amicorum usum servata , nunc plures Neo-

* Tricent. Heautont.

Neo - practicos , & gratis impertiam. Plura si existimaveris adhuc desiderari , relinquuntur omnia ea industriæ tuæ. Interim defectum nonnihil supplere poterunt Colloquia sequentia , ob secretas quas continent instructiones , memoriæ causa , scripto comprehensa. Hæc amici beneficio ad me delata , tecum communicare non dubitavi.

Ceterum ut abstineas à censuris suadeo. Acroamaticas hasce doctrinas si fastidis , si præstantioribus es imbutus , gratulabitur tibi ipse *Schlendrianus* & libenter sua contrahet vela. Si vero te iis usum esse , atque ad eas , ubi consilium te deseruit , confugisse sapius meministi , noli eas invidere aliis. Si cautè in iis versari nondum didicisti , tua erit culpa. Noli etiam Auctori ob propalationem indignari , cujus scopum si non à primordio , quod tamen facile est , intelligis , adire licebit *Jubentium* & ab eo perdiscere. Hic enim ex familiari cum Auctore conversatione de consilio ejus certus , candidè id exposuit in colloquiis ultimis , suo *Domitio*.



COL.



COLLOQUIUM PRIMUM.

Jubentius : Domitius.

JUb. Unde nobis ades, mi Domiti, ocreatus & scuticâ prælongâ armatus? Dom. Ex Atheneo vicino. Persuaserunt enim commilitones aliquot, Wetzlariam excursuri, ut eos comitarer. Feci tanto libentius, quod scirem, te veterem amicum ibi commorari, cujus alloquio fruendi futura esset occasio. Equitantem vero ocreatum esse oportebat, neque, me hercle! macilentum caballum, brevi forte excoriantum, calamo scriptorio incitare poteram. Jub. Bene est. Salvum te esse lætor. Sed videris jam recurrere velle, urbem vix ingressus. Est hodie dies Audiendi publicæ, simulque publicationis sententiarum, cui interesse oportet, & Patrôno meo, Advocato & Procuratori, cujus negotiorum forensium curam per aliquot annos gero, adstare. Adeo, ut parum otii ad confabulandum mihi supersit, hac, qua venisti, die. Dom. Imo vero revertendum mihi est Giesfam hodie. Revocat enim collegium Juridicum, quod ibi frequento. Adpropinquat solstitium vernale, cœlum est serenum, adeo ut sub noctem reverti queam. Intra horæ spacium nostris caballis illuc transvehimur, qui strepitu & clangore scuticarum, mirum quantum!

(H)

ad

ad cursum incitantur. *Jub.* Nunquamne in cursu vestro veloci sessorum unus alterve una cum equo terram ore momordit? *Dom.* Hoc studioso non extimescendum, ad varios casus confirmandus est animus. *Jub.* Ergo alio die redibis? *Dom.* Id equidem certo affirmare non possum. In nostris Collegiis Praxin Cameralem æque addiscimus. Cum essem ad Academiam dimittendus, mater mea vidua, cum peritis consilium iniit, quæ inter multas foret utilior? Alii Jenensem, alii Halensem, alii Tubingensem consuluere. Placuit tandem Giessensis, tanquam Imperiali Camerae proxima, cujus stylus ibi putabatur esse magis, quam alibi cognitus. Animus autem mihi est operam dare studio forensi. *Jub.* Ego tamen utile credo tibi futurum, ut quæ in Collegiis audis, per experientiam confirmentur. In Academiis nonnisi ex libris hauriunt Cameralem praxin. Wetzlaræ, quæ in ipsis rerum argumentis obtinent, experimur. Proinde, ut sæpius huc advoles, suadeo. *Dom.* Fict, si modo pecuniæ ad equum conducendum supersint. Sed quoniam abs te didici, fore hodie Audientiam publicam & sententiarum publicationem, ego, dum commilitones mei urbem transcuritant, temporis lucrum sum facturus, peto igitur, ut me, si licet, in locum Audientiæ deducas. *Jub.* Patent cuique fores, modo sese gerat modestè. Sed properandum est, cum audita sit hora post meridiem prima. *Dom.*



Dom. Siccinē ad horas adstricta est isthæc solennitas?

Jub. Est omnino. Sine ordine temporis negotia rectè peragi nequeunt. Nonne & vobis Studiosis hora collegiorum observanda? *Dom.* Rectè mones, Sed jam expectamus dudum, & nihil aliud video quam viros togatos in conclavi obambulantes?

Jub. Hi sunt Procuratores Imperialis Judicii. Expectant autem initium Audientiæ, quod interdum moram habet, si horis antemeridianis Collegium Camerale ultra undecimam fuit congregatum. Sed ecce! jam subsellia occupant Procuratores, intrat pedellus, præferens sceptrum judiciale Serenissimo Domino Judici, quem sequuntur ex Dominis Assessoribus quatuor.

Dom. Quid sibi vult baculus iste subniger?

Jub. Sceptrum est judiciale, jurisdictionis supremæ signum. Ejusmodi signa judiciaria antiquissima esse historiæ tradunt. Hoc verò sceptrum ab ipso Cæsare Maximiliano I. Imperialis Cameræ Conditore gestum, & Judici Cameræ traditum, conservatumque fuisse, vetus est à majoribus accepta traditio.

Dom. Quare non universi Assessorēs Audientiæ sunt præsentēs?

Jub. Hoc antiquo tempore erat necessarium cum Audientiæ celebrarentur quotidie, posteaquam verò animadversum fuit, negotia judiciaria, actorumque relationes multum impediri tali confesso, externa ista prolixitas est abolita, & compendiosior facta Audientiæ frequentatio. Tu, Domine, hic extra cancellos subsistes, & cuncta ob-

servabis. Mihi locus est occupandus post subsellia, ut
 sim Patrono meo ad manus. Finita Audientia me ex-
 pectabis, & ulterius confabulabimur. *Dom.* Non
 profecto poenituit me hic ad tertiam usque horam ad-
 fuisse. Sed multa sunt, quorum explicationem abs te
 desidero. Ubi quæso erit locus nostræ confabulationi-
 nis? *Jub.* In musæo meo, si placet, & potero osten-
 dere nonnulla ipso opere, quæ verbis exponi non pos-
 sunt, tibi, in hac palæstra plane hospiti. Verum
 quem audio equitantium & scuticarum strepitum?
Dom. Sunt, ut video, commilitones qui recurrunt
 Giessenam. *Commil.* Heus Domiti, nonne redire vis
 nobiscum? *Dom.* Recurrite vos, si placet, ego sa-
 tis mature sum reversurus. Frustra enim hic fuisse
 nolo. *Jub.* Assideamus huic mensæ, nam delassati
 sumus stando in Audientia. *Dom.* Nisi abutar fa-
 vore tuo, ex schedula, quæ plumbo annotavi, ordi-
 ne recitabo. Aliqua, ipsa ratio docet, aliqua opus
 habent explanatione. Quod Iudex & Assessores caput
 obtegant, autoritatis gratia fieri intelligo. Quod is,
 qui prælecturus erat sententias, (ajebant adstantes mi-
 hi, vocari Protonotarium) inclinet se coram Iudice,
 mandatum publicandi nutu accepturus, facile colligo.
Silentium! quod Pedellus inclamat, baculo mensam
 feriens, existimavi à strepitu hominum adstantium
 originem traxisse. Sed ex sententiis planè nihil asse-
 qui potui, quid judicatum sit. *Jub.* Credo, nam
 hoc

hoc vix ii intelligunt, qui Camerali praxi operam dederunt aliquamdiu. Soli Procuratores, qui causæ inferviunt, vim sententiæ quæ prælegitur, capiunt. Interdum ipsi quoque, si non simul advocando causam defenderunt, explicatione opus habent, si, quæ insit sententiæ vis ac potestas interna, scire expediat. Id enim, nonnisi meritis causæ penitus cognitis, percipitur. Deinde ad stylum sententiarum, quid unaquæque vox denotet, intelligendum, opus est exercitatione, neque confabulatione nostra subitanea exponi poterit. *Dom.* Ergo ea de re impofterum uberio rem expectabo informationem. Audivi multari Procuratores in sentiis: mirum tantos viros non agere cautius? *Jub.* Ipsi quidem satis dolent, nomina sua, si mulctantur, publicè exaudiri. Sed hic reniti non licet superioribus. Homines sunt, & tentant pro cliente, quicquid juvare queat, restitutionemque mulctæ expectant. Si amicum habeat quis, à quo moneatur, facilis est modus cavendi, ne omnium oculi in eum qui mulctatur, cum indicatione, ut fieri solet, & nominis, & causæ, convertantur. Sequenti die excussus est rubor omnis. Relatum aliquando memini nescio quo auctore, quod non solum refusionem mulctæ, sed etiam pro reparatione honoris postulare quid liceat, quia propter clientem Procurator mulctatus. Num id fiat, asseverare non audeo, nam talia nobis non patent: Habent sua se-

créta Patroni. Crediderim tamen, si casus existeret, & judicio denunciaretur, animadversionem severiorem insecuturam. Aliquando nulla est Procuratoris culpa, sed clientis vel advocati. *Dom.* Quid verò est, quod aliqui scribunt, dum Protonotarius prælegit sententias? *Annotatio* hæc quare non fit ab omnibus? *Jub.* Annotantur rubricæ sententiarum, addita vocula aliqua, qua designatur, sententiam esse definitivam, confirmatoriam, reformatariam, paritoriam, absolutariam, non-devolutivam, interlocutoriam, actoriam, litis contestatoriam, proclama &c. &c. ut ex catalogo quilibet Procurator eas causas, quas ipse tuetur, discernat, & in Cancellaria copiam, si opus, petat. Qui amanuenses Studiosos habent, curam annotationis his committunt. Proinde nostrum est officium, ut catalogum omnium causarum, quibus patroni nostri inserviunt, habeamus. *Dom.* Sunt ne tam multæ causæ, ut catalogum scripto comprehendere operæ sit pretium? *Jub.* Quidni? Inprimis si aliquis Procuratorum dum versatus est in celebritate. Ego integrum volumen, quod hic vides, ordine alphabetico conscriptum habeo. *Dom.* Mira res, litigiorum nunquam esse finem. Et si procuratores singuli, quos vidi in subselliis magno numero, tot habent causas, quantus erit numerus causarum omnium? Et quanto opus erit numero Assessorum? *Jub.* Verum est, etiam pauciores Procuratores plus negotii facessere posse quam Assessorum
nume-



numerus præfens defuiffe queat. Sciendum tamen, litium multitudinem nafci non ftudio Procuratorum fed à cupiditate mandantium. Neque repugno, reperiri inter Advocatos qui lites in quæftu habent. Procurator merita caufarum eognita habere non potef, hinc bona fide fufcipit rem fibi demandatam. Obfervandam porro, in magna proceffuum copia, non omnes effe pari difficultate. In Catalogo Procuratoris mei fatis prolixo, (funt autem multæ dudum defuiffæ caufæ) fi exceperim viginti circiter, reliquas facilioris effe laboris credo. *Dom.* Proinde fi pauciores funt caufæ majoris momenti, & laboris difficilioris, ex hisce folis expectanda poftulantibus largitio uberior? A qualitate enim caufæ æftimari honoraria æquum videtur. *Jub.* Abfit. Eadem eft ratio five de mille Imperialibus, five de centum millibus agatur. A labore, non à pretio caufæ, honoraria merentur Patroni. Potef effe caufa levioris pretii, & magni laboris. Viciffim alia expeditior, & magnæ æftimationis. Interim qui magis honorant Patronos, hos honorari & coli præ ceteris, ratio dicat. *Dom.* An expectanda eft Procuratoriolutio honorarii finita caufa? *Jub.* Fatuus effet, qui hoc faceret femper. Nam ex vento non vivitur. Sunt clientes, quorum crumena premenda eft dum dolet, juxta regulam difcipulorum Hippocratis: Non repetitur datum. Et nemo adeò ineptus eft, ut rationem inire nequeat pecuniæ prænumera-

merata. Idcirco ne defraudetur Procurator cavendum ipsi est à principio. Dantur multi litigantes ingrati, qui credunt, se non debere honorarium, nisi res ex voto succedat. Dantur etiam, à quibus non, nisi precibus aliquid obtinere licet. *Dom.* Memini ex lectionibus Academicis Procuratorem esse litis dominum, annon ergo dirigere poterit processum ad exitum speratum?

Jub. Næ tu mihi videris quovis Domitio stultior. Dominium litis, si hunc haberet effectum, Procurator adversarius æquè foret litis dominus, & suo mœneri non defuturus. Abusus est, si Procurator aliquis suam esse eam auctoritatem apud Judicem existimat. Meus sane Patronus valde hoc mihi inculcavit, quem tamen scio esse in celebritate & existimatione. *Dom.* An ergo omnes in æquali existimatione non versantur.

Jub. Hoc à fortuna dependet, si cætera rectè se habeant, studia, sedulitas, prudentia. Nusquam tamen abest, nisi uno ex his deficiente. Quemadmodum verò in omni ordine ingenia hominum, non sunt æqualia, ita & hic usu venit. *Dom.* Quid consilii ergo ut largiora possint esse Procuratoris commoda?

Jub. Qui advocando etiam laborant, existimationem facilius acquirere possunt, & hic est gradus proximus ad clientes plurimos habendos. Sed cum laboriosum sit nimis officium Advocati, solent plerumque in Procuratorum numerum relati, postulationibus vacare parcius.

Excu-

Excusatio facilis, & vera, quod Procurator variis curis quæ omitti non possunt, ab officio Advocati, quod non nisi paucis causis bene tuendis sufficit, impediatur. Ille plurimarum sollicitudinem habere debet & potest. Tum vero studendum est, ut à Principibus & Statibus Imperii annua impetrentur salaria. Sunt etiam privati litigantes honoratiores, qui ob plures causas, quas habent, annum salarium promittunt. Sed plerique utuntur Advocatis extraneis. Credunt enim hos esse magis informatos. Et jam in unaquaque Provincia numerus est Advocatorum tantus, ut alter alterum, ceu figulus figulum odio habeant. A meo patrono didici, olim Spiræ præstantissimos totius Germaniæ fuisse Advocatos, ut, qui causam graviolem defendendam habuerit, Spirensē Advocatum sibi quæsierit. Alii sunt hodie mores, & nimium evulgatæ artes. Deinde, ut antea memini, in tempore est vigilandum, ut sumtibus suppeditent clientes. *Dam.* Nimium deflectimus ab ordine Audientiæ. Quare discesserunt Serenissimus Juxex & Assessorum tres, uno remanente & sceptrum occupante. *Jub.* Finita sententiarum publicatione inceperunt, ut audisti, Procuratores causas suas perorare. Huic rei auscultabant olim Juxex & omnes Assessores congregati. Cogita, quam tædiosa & somnifera fuerit auscultatio distantium singulorum in unaquaque causa postulationes, assertiones, contradictiones, *Recessus* vocant, (nos etiam hac voce usi-

(1)

tata

tata utemur) quos Notarii calamo excipiebant, ita ut in aliquot mensibus ordo inter Procuratores absolveretur. Fuere tamen longe breviores quam hodie esse solent. Isti vero rei remedium attatum post Recessum Imperii Anno 1654. Neque opus est, ut plures Assessores, quam unus, Audientiæ præsit. Quandoque etiam unus ex Dominis Præsidibus solum occupat loco Domini Judicis. *Dom.* Observavi silentium perpetuum ejus qui Audientiæ præest, nisi quod in juramento præstando Procuratori verbis præierit. *Jub.* Verum est, & nihil habet quam hoc loquendum, qui Audientiæ præsidet. Nisi quod observaverim quandoque, ubi Procuratores, contradicendo sibi invicem, moderationis terminos excederent, Assessorem interloquendo inhibuisse. *Dom.* In nostra patria etiam est illustre Judicium provinciale, ubi tamen audientiæ hujusmodi non frequentantur. An ergo necessaria est Judicio Camerali Audientia? *Jub.* Est omnino ex prima hujus Judicii constitutione, & habet suos usus insignes. Ut tacéam, ordinem Procuratorum in Camera magis celebrem reddere, utilitas est hæc inter alias plures, quod non necesse sit partes ad quemcunque actum judicialem citare, sed quicquid sit Procuratore præsentem, id vim habet notitiæ legalis. *Dom.* Ergo si absens est Procurator, cessabit iste effectus? *Jub.* Minime. Sufficit enim adesse ejus mandatum generale ad acta productum. Si valetudine vel alia justa causa impediatur, ut inter-

interfit Audientiæ, poterit ex Collegis alium rogare, ut Recessum scripto comprehensum in ordine recitet. Hinc mandata continent facultatem substituendi. Substitutus autem ordinarius, in mandato nominatus, non semper est is, qui rogatur, sæpe alius. Et nostri muneris est plerumque quærere ex Procuratorum præsentium numero aliquem, qui hoc officio libenter defungatur. Seniores autem requirere solent juniores, non vicissim, nisi sit proximus in subselliis. *Dom.* Nonne hoc foret munus substituti ordinarii? Ad quid ergo substitutio in formula mandati? *Jub.* Non ineptè quæris, sed ita res sunt comparatæ, ut is, qui substitutionem in ipso mandato subscriptione sua accepit, de omnibus causæ meritis nihil sciat, neque ei à Procuratore Principali quicquam aperiatur. Adeo, ut haud rarò substitutus parti adversæ officio suo adstet, suæ substitutionis immemor. Cautus fuit meus Patronus, ne à se id fieret. Eum in finem mihi demandatum fuit, catalogum substitutionum conficere, ne vel utriusque partis Procuratori ignoranter fiat substitutus, vel adversariæ partis Procurator ordinarius. Duplex substitutio hac cautela evitabatur, &, si alterâ pars ordinarium desideraret patrocinium, dimittebat Patronus meus substitutionem. *Dom.* Nondum audiui cujus usus sit substitutio. *Jub.* Lege est sancita, sed usus non alius, quam ut, existente fortè casu mortis Procuratoris, sententia possit ferri contra substitutum, qui sæ-

penumero se esse substitutum, dudum est oblitus. Nam subscribit mandato substitutus plerumque in Audienciâ cum producendum est mandatum, & mutuos sibi honores eâ in re exhibere solent Procuratores. Plerumque subscribere rogatur tanquam substitutus, junior Procurator, non æquè ex senioribus aliquis à juniore. *Dom.* Ego credidi, ab ipso principali litigante eligi personam substituti? *Jub.* Minime gentium. Hi sæpe nec Procuratorem aliter quam solo nomine norunt, multò minus substitutum. *Dom.* Unde verò hoc accidit? *Jub.* Docebo te hoc, Domiti. Procurator Cameræ parare sibi debet amicitiam & fiduciam Advocatorum, cum primis in Provinciis, ubi regnant litigia. Hi quascunque causas ad hunc deferunt. Si opus est mandato, transmittitur formula mandati typis impressa, & relinquitur plerumque arbitrio Procuratoris electio substituti. Ego diebus Juridicis horâ undecimâ antemeridianâ Cancellariam intrare soleo percontatum, an pro meo Patrono aliquod ex Senatu prodierit decretum, ubi simul rimari studiosè didici, quis alius Procurator processus obtinuerit, tunc sine morâ nunciandum hoc parti adversæ, & offerendum studium atque officium, addendo simul formulam mandati procuratorii, cujus subscriptio petenda. Licita hæc est patrociniatorum aucupatio. *Dom.* Sanè non contemnenda hic abs te discò, quæ nunquam in Academiâ audissem. *Jub.* Oblitus eram indicare tibi, quod



quod aliqui substituti ab ipsis litigantibus eligantur cum spe succedendi ad munus ordinarium, cumprimis hoc fit ab Electoribus & Principibus Imperii. *Dom.* Cum dixeris antea in nonnullis locis regnare litigia, scire vellem quænam urbes aut regiones isto nomine celebrentur? *Jub.* In universa Germania non est exiguus litigantium numerus. Testatur id magna ubique Advocatorum copia, qui omnes de victu parando laborant. Qui praxin incipiunt, neminem ejiciunt foras. Meus Patronus non paucos aliis commendare solet. Delectus enim habendus est clientum. *Dom.* Audiavi aliquando in collegio meo Academico, Leodienses magnam messem præbere Dominis Procuratoribus laborum juxta & præmiorum. Leodiensem patriam Advocatorum esse nutriculum. * *Jub.* Ita creditum fuit aliquando, & felicior habebatur Procurator, qui cum Leodiensibus Advocatis literarum commercio correspondentiam vocant, fruebatur. Meus Patronus nullas habet, neque, credo, habere voluit. Sunt homines generosi inter Leodienses sicut alibi, sunt plures numero pecuniæ tenaces. Advocati domestici non desunt ibi fructus, cum spes adhuc est incrementum, decerpere. Wetzlarum plerumque derivantur reliquæ, quando litigantes sunt ferè delassati. Nimius Advoca-

(I) 3

cato-

* Africa dicebatur olim causidicorum nutricula, Juvenal. VII. vers. 149. deinde Roma, Jac. Gothofred. ad lib. 1. Cod. Theodof. de Studii Liberal. Urbis Roma & Constantinop. lib. XIV. tit. 9.

catorum Leodiensium numerus effecit , ut hodie non adeo habeantur fructiferi clientes Leodienses , quam erant olim. Deinde, quod antea paucis ex ordine Procuratorum erat proprium , causarum Leodiensium patrocinium , jam in plures est divisum. *Dom.* Perge quæso enarrare ea, quæ vobis amanuensibus incumbunt. Est enim mihi consilium , addicere aliquando meam operam alicui Procuratorum. *Jub.* Præcipua nostra cura esse debet , ea , quæ ab adversario Procuratore proponuntur , accipere , notare , & in protocollum domesticum digerere. Ergo , licet Procurator Audientiae non intersit , nostra tamen præsentia & cura supplere solet , quæ sunt necessaria. Intelligis , mi Domiti , quantum sit positum in bono & rerum perito amanuensi. Is omnium causarum curam gerit , monet ; suggerit , quæ agenda sint. *Dom.* Quid autem sibi vult illa sæpe repetita obambulatio pedelli , & amanuensium circumitio. *Jub.* Distinctas res quæris : Distincta ergo opus responsione. Pedellus circumit sciscitando , quis ex Procuratoribus aliquid proponendum habeat in debito ordine , & *Recessus* cujusvis , copiam adversario Procuratori , cujus nomen schedulæ inscriptum , accipit , traditque. Amanuenses verò quandoque ipsi tradunt copiam recessus , quando declinanda est alterius contradictio. Ego sæpius me contuli ex loco meo ordinario , ad illum , qui est Procuratori adversario proximus , huicque recessum meum non prius tradidi ,



didi, quam posteaquam à Patrono meo esset recitando absolutus, & ita excluderam contradictionem. Sunt enim inter Procuratores, qui nihil facile sine contradictione transire patiuntur, & cum tales Recessus contradictorii dictentur Notario, temporis fit jactura interdum, instat sententiarum publicatio, & vigilandum est, ne per istiusmodi contradictionem aliquid scrupuli injiciatur. Nemo facile hanc praxin intelligit, nisi qui in ipsis rerum argumentis versatur. *Dom.* Audivi aliquoties Procuratorem, recitantem suum pensum ex scripto, aliquid corrigi velle aut adponi: Inquit enim Protonotario & Notariis mensæ adstantibus: *Corrigatur*, vel *addatur*, *si placet*. Putarem hæc domi accurate examinanda fuisse. *Jub.* Debeamus quidem. Sed facile est, ut error aliquis obrepit. Meo Patrono id rarò accidit, quia, licet ego Recessus leviores in Audientia recitandos ab ipso, plerumque componam; (nam qui momenti aliquid habent, ipsis Procuratoribus curæ sunt, & sæpe cum Advocato communicandi, vel ab eo expectandi) securus tamen esse possit de mea industria, & accurate conscripta tabellâ. *Dom.* Qualem mihi nominas tabellam. *Jub.* Tabellam vocamus folium istud unum, vel plura conjuncta, in quo omnes Recessus, in unoquoque ordine & unaquaque Audientia recitandi, Protocollo singularum causarum inscribendi, conscripti sunt, & ad marginem cujusque Recessus nomen Procuratoris adversarii expressum. Dicitur

citur etiam frequentius *Designatio Recessuum*. Hujus tabellæ duo habemus exempla, eadem forma descripta, quæ ad mensam Notariorum per pedellum deferuntur, quorum unum penes Lectores manet, qui sunt Archivarii Camerales, alterum apud Notarios Cancellariæ, & quovis trimestri spacio in unum volumen compinguntur. Alia duo exempla sunt ad manus, quorum unum est Procuratoris proprium, ex quo recitat Recessum viva voce, alterum est scissum in parvas schedulas, cuique causæ proprias, quæ traduntur Procuratoribus adversæ partis. *Dom.* Cujusnam est, recessus istos ad singulas causas digerere. *Jub.* Est Notariorum vel Lectorum. Idque vocant *compleri Protocolum*. Fit hoc, quotiescunque est opus, addita voce *Completum*: & die. Quodsi nihil accesserit novi, indicatur per voculam *visum*, *revisum*, *nihil preterea actum*, & similes. Cura autem, ut inscribantur Protocollo Recessus tempestive, est Procuratorum, quam demandatam nobis, suscipere oportet. Sollicitanda enim est hæc res quotiescunque sententia exoptatur. Et in infinito numero causarum, cum unius hominis non sit labor in complendis Protocollis, sæpius iteranda est monitio. Neque enim sententia ferri potest, nisi ad Acta integra, quorum pars princeps est Protocolum. *Dom.* Multum ergo laboris vestris manibus incumbit, si quemque Recessum quadruplici exemplo describere est necesse. *Jub.* Verum dicis, sed pro

pro numero negotiorum hæc res non est amanuensius unius. Ego potissima curo, & reliquis pensa distribuo. Nuda describendi opera facile alii mandari potest, sed recessus ipsos quandoque componendi, longè major & præstantior est cura : tum vero Calendarium terminorum legalium vel præfixorum, vel collectorum ordinatè habendi : omnes recessus protocollo majori domestico accuratè inscribendi : & indicem conficiendi : aliquod millia epistolarum, correspondentiæ, ut vocant, & sub finem anni votivarum apprecationum ad clientes exarandi, epistolas ad locum cursus publici deferendi, & pecuniam pro iis exsolvendi. *Dom.* Num verò literarum sumtus, magistro cursus publici deferendi, à procuratore erogandi? *Jub.* Omnino, & hoc onere maximè gravatur officium Procuratorum, cum non sint exigui sumtus, & difficilis à clientibus recuperatio, qui tamen de statu rerum suarum informari volunt. Hinc si prænumerationem postulet Procurator, hoc ei vitio non vertendum. Cura rationum etiam mihi est commissa. *Dom.* Ita, ut audio, non multum otii vobis superest. *Jub.* Certè parum, si negligentes haberi nolumus, & maximè ab Audientiâ post publicationem sententiarum. Nostra tamen versatur utilitas in addiscenda Camerali praxi, & acquirimus notitiam rerum forensium & personarum, facilioremque aliquando aditum ad officium aliquod publicum. Me hic vixisse per annos aliquot, & Patrono meo fuisse à

(K)

mani-

manibus, sæpè à pedibus, nondum pœnituit. Sed tamen ætas me invitat ad honores alios petendos, & ad uxorem ducendam. *Dom.* Ego igitur, cum hodie fuerit dies Audientiæ & sententiarum publicatio, tibi incommodare amplius nolo, advesperascit jam, & videtur insurgere aliqua tempestas, alia vice ulterius colloquium, ex quo jam doctior Giessenam redeo, expetiturus. *Jub.* Eris mihi semper gratus, & ego tuo desiderio non defuturus. Cave ne equus te ejiciat. *Dom.* Nullum est periculum, modo ego equum portare non debeam, qui sessorem vix gestare posse videtur. *Jub.* Tanto gravius periculum. Ergo feliciter abi, & Vale.

COLLOQUIUM SECUNDUM.

Jubentius : Domitius.

D*Om.* Salve mi Jubenti, amice charissime! Non potui non ad te reverti, cum à nupera conversatione desiderio magno plura abs te discendi, fuerim inescatus. *Jub.* Salve vicissim, charissime Domiti. Sed die Dominica te non expectassem. *Dom.* Equidem hac die veni, ut pernoctarem Wetzlaræ, quo magis sequente die tota fruerer, si licet, tua instructione. *Jub.* Consilium non est malum, poteris enim

enim crastino die horis matutinis confluxum sollicitantium tuis oculis cernere. Sed interim tu sacris non interfuisti? *Dom.* Interfui in hac urbe à prandio. *Jub.* Mirum, si tu Studiosus Academicus tantum habuisti & patientiæ & religionis. *Dom.* Quasi vero studiosi essent ab hac virtute alieni. *Jub.* Certè vos ea deceret maxime. Sed vidimus hic sæpe studiosos, ædem, cum sacra celebrarentur, ingressos, non auditum, sed spectatum, & post gesticulationes aliquas, quibus aliorum auscultantium attentio turbatur, mox recurrentes ad diversoria. Nescio an Jenensium quorundam Studioforum mos, quem ego olim sæpe non absque offensione vidi, ad vos etiam translatus fuerit. Tu si meliora sequeris, si mente es saniore, senties apud temetipsum quantæ sit tibi futurum utilitati. *Dom.* Imo verò juvenilis ista insania mihi valde displicet, quando à parentum vel præceptorum reprehensione liberati, hac sua libertate ad immodestiam usque abutuntur, aliorumque exempla non bona, sed animadversione digna, imitantur. Auscultavi attentè sermoni sacro hodierno, nihilque quod offendere posset orthodoxos, audiui. Nescio an fuerit is, cui de doctrina litem motam esse percrebuit fama. *Jub.* Fuit, sed præstat Domiti, ut ea de re tuum suspendas judicium. Ex uno sermone Doctor Ecclesiasticus non dignoscitur. *Dom.* Credo, sed est apud plerosque, ut accepi, existimatio viri optima. Nemo sanè Theolo-

gos publice probatos absque injuria heterodoxiæ est in-
 simulaturus. *Jub.* Mihi quidem hisce de rebus inqui-
 rere per alia negotia non licuit, sed quantum ex ore
 Procuratoris Patroni mei audiui, huic ille non proba-
 tur. *Dom.* Quàmobrem? Putarem ex fructibus dig-
 nosci debere Doctorem? *Jub.* Nescisne tu quoque
 fuisse inter Doctores reprobatos, in quorum externis
 moribus nihil fuit reprehensione dignum? *Dom.* Pu-
 tasne tu omnes, qui ab aliquibus reprobantur, pro-
 pterea esse habendos pro iis quos consensu omnium
 damnari oporteat? Inverte casum, agnosces errorem
 tuum. Mea sententia, hoc ipso, quod inter nostræ
 Confessionis Theologos in Academiis celebratissimos,
 non eadem hisce de rebus est sententia, certum fit,
 quod disputatio tota, si fortè aliqua non est de solis
 verbis, non sit de articulis fidei fundamenta attingen-
 tibus: Aliàs enim ex unâ aut alterâ parte Theologorum
 ad officia publica docendi, & in Academiis quidem,
 non essent recepti: Proinde eum qui alterutrius senten-
 tiam laudat, censura dignum non esse. *Jub.* Ego in
 hac materia me non satis versatum agnosco. Propo-
 nam quæ dixisti data occasione Procuratori meo, &
 alia vice tibi respondebo. Vocor jam ad disponendum
 crastinas rerum forensium curas. Proinde crastino
 mane ad me redibis, comitaturus me ad curiam.
Dom. Adero ante horam septimam matutinam, in-
 tetim vale. *Jub.* Tu quoque nocte quieta fruire.
Dom.



Dom. Adsum ut jussisti, & video te, mi Jubenti, occupatissimum. Multosque utriusque sexus homines tuum expectantes auxilium. Credo esse hic, causas suas sollicitaturos, sed ex gente rusticâ vel infimâ plebe.

Jub. Sic est, & à Patrono meo ad me missi, ut, cum ipse honoratioribus aliquos audir, ego his quaecunque largiar solatium tradendo iis schedulas sollicitatorias, quibus unusquisque Dn. Judicem, Dnos. Præsides, Dnos. Assessores aggrediatur quotidie. Nos enim non decet talis importunitas, quæ rusticitati facilius condonatur.

Dom. Habetne flagitatio ista eum effectum ut maturetur negotium. *Jub.* Nequaquam.

Interim alia ratione liberari ab hoc genere hominum non possumus, qui Procuratorum ædibus quotidie sunt molesti, nisi manus eorum schedulis impleantur.

Dom. Multum ergo operæ facessunt hæ schedulæ.

Jub. Quidni? Sed tamen ad rationes referunt aliqui hunc laborem. Apud nos amanuensibus non invidetur, si aliquid honorarii dare velint litigantes: Sæpe numero unum exemplum schedulæ sufficit, in quo describendo aliquoties, ipse cujus causa agitur, si artis scribendi est peritus, & leviori sumptui vel ob indigentiam propriam, vel ob tenacitatem, parcere studet, à meridie est occupatus. Sunt enim, qui nihil aliud quam hoc agere possunt vel volunt. Sunt alii, etiam Procuratores, qui typis mandari curant schedulas sollicitatorias, quibus uti possint ubi opus, & sic

liberantur amanuenses ab istâ operâ , idque fieri operant qui nobiliori labore , uti ego , occupari possunt.

Dom. Vellem ut explicares mihi modum schedulas has conficiendi. *Jub.* Rubrica processus primo loco nominari debet , personarum , tum vero petiti , jam pro decreto mox pro sententiâ. Interdum causæ merita potissima , quantum schedula capit , inferenda , sed hoc operæ non est perfunctoriæ. Quibus ampliores sunt facultates , curant ab Advocato etiam speciem facti ex Actis elaborari , cum rationibus sui petiti , eamque typis mandatam distribui.

Dom. Cujus vero utilitatis facti species à parte conscripta , cum unusquisque eam prout sibi consultum , est elaboraturus , Acta vero Judici cognita esse debeant ? *Jub.* Non male quæris , sed accipe informationem. Species facti à partibus vel eorum Advocatis conscribi non debet eum in finem , ut Judex ea utatur loco Actorum judicialium. Deinde male consulturus foret sibi , qui speciem facti concinnaret Actis contrariam , vel infereret eidem quæ in judicio non forent prolata. Talis enim astutia detegeretur confestim , periculo auctoris. Sed cum adfint causæ innumeræ decisionem expectantes , elaboratio exacta speciei facti Actis conformis promovere poterit decisionem causarum ratione triplici. *Unâ* , ut Dominus Judex perspecta causæ cum qualitate , tum gravitate vel levitate , distributionem Actorum sciat dirigere & pro exigentia rei maturare. A mole Actorum
non



non semper æstimatur causæ gravitas. Sunt Acta magnæ molis, facilioris tamen decisionis: Sunt alia externa specie paucioribus foliis composita, ad decidendum tamen satis intricata & difficilia. *Alterâ*, ut in majori Actorum distributorum numero, referens, facta forte animi gratia inspectione speciei facti, ad conferendam eam cum Actis adducatur, & si res deprehendatur expeditior, elaborationem Actorum suscipiat promptius. *Tertiâ*, & potissima, ut in ipsa relatione Actorum, Domini Assessores qui ei interfunt, de meritis aliquo modo informentur, ad quæ in recensione Actorum animum advertere queant. Hoc voluit *Recessus Visitat. noviss. §. 71.* Proinde concinnatio speciei facti est utrique parti libera, & quod ab una parte omissum, altera, si ad rem facere crediderit, non negliget. Laboris itaque est non perfunctorii speciem facti bene conscribere. *Dom.* Omnia bene intelligo, sed revertor ad schedulas sollicitatorias. Quare in hac schedulâ additum est: *Summum in mora periculum:* *Jub.* Equidem hoc partes addi volunt, ut forte decretum vel sententia maturetur, frustra tamen hoc speratur, neque Dni. Assessores ideo citius causam referunt, neque esse tale periculum statim ideo credunt, quod schedula hoc dicat. *Dom.* Explica mihi has abbreviaturas id schedulis *Mdti. S. C. C. C. Cit.* *Jub.* Significatur esse causam *Mandati Sine Clausula* vel *Cum Clausula* vel *Citationis*: *Dom.* Qualem mihi nominas

nas *Clausulam*. *Jub.* Quæris rem, quam credo superare adhuc captum tuum. *Clausula* intelligitur justificatoria facti ob quod Mandatum fuit impetratum. Sed hæc res uberiore opus habet explicatione quam ut hoc loco & tempore fieri queat, *Commentarii* ad *Processum* *Cameralem* hic sunt adeundi, inter omnes præcipuus *Blumii*. Is enim nobis jam dudum omnem fecit paginam, nescio an etiam aliis. *Dom.* Quidnam significat in schedulâ hæc abbreviatio *S. Q.* forte denotatur *Senatus Consultum Quirinianum*. *Jub.* Ha, ha, hæ! Quale tu mihi hîc *Senatus Consultum* fingis. *Dom.* Audi vi à commilitonibus meis *Academicis* aliquando hoc nominari. *Jub.* Nisi mihi verba das, crediderim lusus gratiâ aliquem ineptivisse, quod seriò accipere non oportet. Abbreviatio *S. Q.* Rubricam *Actorum & Processus Simplicis Querela* denotat, cujus explicatio ex *commentariis* petenda, nam tu, si pateris tibi imponi à commilitonibus, ut *SCtum Quirinianum* aliquod credas, quovis dupondio es imperitior. *Dom.* Gratias tibi habeo pro correctione meæ ignorantie, neque mihi posthac verba dari patiar. *Jub.* Eamus jam in publicum; audita enim est hora septima, & videbis undiquaque sollicitantes. *Dom.* Ecce hic virum ornatissimè vestitum, comitantem foeminam non minus comtam, si esset meridies, putarem esse conjuges ad convivium nuptiale euntes. *Jub.* Ita decet incedere *Procuratores* si ad *Dn. Judicem*,
Dnos.

Dnos. Præsides & Assessores clientes suos deducere velint, ut copiam habeant sua desideria coram exponendi. Ecce hic ex Dnis. Procuratoribus intrat, stipatus aliquot civibus ex universitate. *Dom.* Fitne hoc omnibus clientibus qui præsentes sunt & quotidie? *Jub.* Absit, quis enim hoc pati posset. Sufficit ut fiat semel vel iterum, neque ut gratis hac opera defungantur Procuratores, clientes boni desiderant. Hodie accidit hic, cras alius. Et non mediocris est patientiæ clientes non modo domi audire de propriis rebus & statu quæstionis sat male nonnunquam instructos, & confusa narrantes, sed etiam vestiri, deinde palliatum per plateas obamulare, quandoque tempestate ventosa quæ comam bene dispositam & pulvere farinaceo dealbatam disjiciat: *Dom.* Eheu! quantus hominum confluxus hic est in anticamera Dni. Jüdicis. Horumne omnium causæ hodie tractabuntur? *Jub.* Paucissimorum quidem fieri potest, sed solatium qualecunque habent clientes & ipsimet Procuratores, si patienter audiuntur. *Dom.* Estne satis temporis ut etiam Dnos. Præsides & Assessores ante consilium accedant hi omnes. *Jub.* Non est ut intelligis, neque hoc quærunt. Alii quotidie hic se sistunt, ut solo aspectu meminerit ipsorum Dnus. Jüdex, si jam aliquoties alloquendi eum data fuit occasio. Alii alio die conveniunt Dnos. Præsides. Rarius patiuntur alloquium Dni. Assessores, neque iis incommodare licet adeo frequenter. His
(L) enim

enim laborum ratio est habenda. Pergamus ad curiam, videbis hic varii generis sollicitantes. *Dom.* Video, & ecce! hic aliquis Dno. Assessori in transitu schedulam suam obtrudit. *Jub.* Summa est quandoque istorum hominum rusticitas, & putant, nisi omnibus schedula tradatur, peccatum aliquid fore. *Ob.* serva, Domiti, aliquos occupare certum locum à quo dimoveri se non patiuntur, non magis quam sutores in nundinis. Aliquos schedulas suas magnis literis, alios coloribus, alios ligulis sericis, ornare. *Dom.* Quem in finem? *Jub.* Credo putare eos quod hac ratione memoria causæ firmitior sit futura. *Dom.* Si quotidie tot schedulas accipiunt Dni. Præsides & Dni. Assessores singuli, putarem oblivisci eos causarum quæ in tanto numero celeriores desiderant expeditionem. *Jub.* Credo id fieri nonnunquam, proinde ut audio Dn. Judex & Dni. Præsides notare solent eas quæ maturatione opus habent. *Dom.* Ita forte etiam bibliopola suum locum tueretur in vestibulo Curiae? *Jub.* Equidem hic non est hic sollicitatum, sed mercatum: Et commoda est, ubi multi concurrunt literati, occasio cum emtoribus, tum venditori. *Dom.* Video etiam Procuratores hic esse sollicitantes. *Jub.* Utique, si fortè brevibus verbis sese expedire possint. Et observa hos non in turba stare, sed locum commodum, ubi alloquio frui possint, occupare, omnes ut decet palliatos. *Dom.* Introierunt jam Senatores sua quis-

quisque triclinia, nihil hic observandum superesse credo. Quid cessamus discedere domum? *Jub.* Speculatus sum ego adhuc, in quo triclinio qui, & quanto numero Assesores, congregarentur. *Dom.* Quem in finem? *Jub.* Tibi hoc explicatu difficile, neque omnia pandi debent. *Dom.* Videris hic esse invidiosior. *Jub.* Minimè, sed quia longiori explanatione opus foret quam tu pati possis vel intelligere. Abeamus jam domum, horâ undecimâ redituri. *Dom.* Dic mihi jam qua ratione unus Dn. Judex & Præsides duo Senatibus pluribus præesse possint. *Jub.* De officio ipso loquitur ordinatio. In Senatu quomodo sese gerant, ego sanè scire non possum. Hoc observavi, quod non semper in eodem versentur Senatu, sed in hoc jam, mox in illo, adeo ut nulla dies transeat in qua Dn. Judex non ierit omnes Senatus visitatum. Ipse enim quid in unoquoque agatur scire debet, & credo inter ipsum & Dnos. Præsides conveniri, ubi Judicis, vel unius ex ipsis necessaria sit præsentia. *Dom.* Licetne in Musæo tuo bibliotheculam tuam inspicere. *Jub.* Licet, nihil magnopere comparavi mihi, cum hic loci manere perpetuò non sit mei consilii. Patronus meus Procurator instructissimam habet Bibliothecam, quâ si opus habeo liberè utor. *Dom.* Non parvi habendum est hoc beneficium. Qualis hic permagnus liber? vidi tales in ædibus argentariorum mercatorum. *Jub.* Externâ formâ talis est, sed intus est Protocollum

(L) 2 dome-

domesticum mei Procuratoris. Hic meus labor præcipuus, ut ordine omnes Recessus inscribantur à quavis Audientia, cum à meo; tum ab adversæ partis Procuratore prolati, nomina causarum, deinde pro evolutione prompta in indicem Alphabeticum, indicato folio cujusque Recessus, referuntur, signatum frustulis membranæ, ut scis libros Pandectarum signari. *Dom.* Hoc mihi foret incommodum, semper novum evolvere folium, præstare puto ut causæ uniuscujusque Recessus Protocollares separatim conscriberentur in una serie. *Jub.* Faciunt id aliqui. Sed duplicatus foret labor, cum nihilominus liber talis universalis faciendus foret, quia facilius est ut separata charta deperdatur, quam tantæ molis liber. Ego credo in nostro musæo diligentius quam in multis aliis res ordinatas esse, & vidi apud aliquos mei ordinis amanuenses res multò confusiores, ut necesse sit ad Acta in Lectoria Camerali, h. e. Archivo, existentia, recurrere. *Dom.* Fasciculos Actorum in hoc musæo plures video quam capere queat. *Jub.* Acta integra ne quidem adsunt, nisi in paucis causis, præcipue verò in iis quas Patronus meus advocando defendit; *Dom.* Unde ergo ista fasciculorum moles? *Jub.* Præter fragmenta quædam Actorum, sunt maximam partem Epistolæ litigantium vel Advocatorum & ad eos perscriptarum exempla. Nec non rationes expositarum pecuniarum, debiti & accepti honorarii. *Dom.* Si de exponendis pecuniis audio, dura



dura mihi videtur conditio Procuratorum. *Jub.* Credo, ut adeo sit mirum, esse quotidie, qui titulo Advocati vix biennio otiose gesto, ad numerum recipi velint. Falluntur qui, rerum non experti, credunt, ex Processibus copiosam honorariorum messem ad Procuratores redire. Sane si litigantes omnes ad elargiendam pecuniam essent adeo alacres, quam sunt ad Procuratorum officium flagitandum, non adeo onerosum foret, prout revera est, istud munus. Inolevit mos injustissimus, ut posteaquam aliquid arhar loco dederint, à Procureatore erogari pecunias exoptent, redditori, si finis litis ex voto ceciderit. Ubi decollavit spes, nihil se debere credant. Patronus meus multas rationes habet pecuniarum expositarum, recuperandarum vero spem parvam, & hæredibus forte relicturus. *Dom.* Credideram annuis salariis refarciri hæc omnia, quorum plurima habere Dnos. Procuratores accepi. *Jub.* Annua promissa dices potius, quam præstita. Numerantur equidem pauci qui promissorum sint cum effectu memores. Vitium est commune & vetus jam „olim à *Seneca* notatum, quod pauci intelligant, tantum se gratiæ demere, quantum moræ adjiciunt. „In tædium adduci animum, dum expectatur nimium „beneficium. Omnem benignitatem properare, & „proprium esse libenter faciendis, cito facere. Qui „tarde & diem de die extrahendo profuit, non ex animo fecisse. Ita duas res maximas perdidisse, & tem-

pus, & argumentum amicæ voluntatis. Sint aliqui æquiores, hi sane tantum non præstant, quantum ad sustentationem est necessarium. Sint etiam aliqui ex Dnis. Procuratoribus (paucos credo fore), ea in re feliciores, ad fortuita hoc referendum erit, nec invidendum. Ego de eo quod passim fit, instruere te volui, & ab ambiendo hoc officio oneroso, nisi facultates habeas ad præerogandas pecunias, & simul patientiam ad expectandum obfirmatam, dehortari.

Dom. Non ergo deberent admitti Advocati & Procuratores tanto numero? *Jub.* Id equidem exoptatum sæpe fuit: Quis verò prohibere poterit, ne, qui studii Jurisprudentiæ operam dederit, exinde victum quærat. Ad Judicum officia non cuivis datur accessus. Ergo postulare est liberum. Hinc Advocatorum in numerum receptorum plures esse solent quam Procuratorum. Horum numerus legibus est definitus. Pauciores tamen esse non est vetitum. Unusquisque suo periculo admitti petit, & admissus, tentamine eruditionis prævio, spe qualicunque fretus quod quælibet terre alat artificem, officium gerit.

Dom. Intellego jam istius officii difficultatem & onera, neque aliis, quam qui nominis famam tractu temporis obtinuerunt, esse fructuosum. Licetne sciscitari quantum salarii annui unusquisque promittere sibi queat. *Jub.* Promittere sibi quisquis potest decem mille sestertia & ultra. An vero accepturus sit, ab ipsius spe & promissione non



non dependet sane. *Dom.* Videris jam velle jocari mecum. *Jub.* Equidem curiositas tua inepta talem exigebat responsionem. Credidissem didicisse te ex colloquio præcedente, certum salarii quantum annum non dari, sed prout fors ceciderit. In honore est officium Dnrum. Advocatorum & Procuratorum Camerae, quibus si præmium dignitatis juxta & laborum tribuatur, non est injustum neque invidendum. Experimur nos verissimum & dolemus, quod litigantibus permultis, eorumque Advocatis, prima ultimaque sit cura ut Processus in Camera pendeat. Et nisi pars altera urgeat finem, patiantur pendere in perpetuum. Interim de salario nulla mentio. Volunt tamen fieri certiores quæ in judicio agantur. Quæ opera non levem nobis facessit molestiam. Tandem si præter ea, quæ certam habent in legibus æstimationem, pro annuis laboribus cujusvis causæ, in agendo, movendo, promovendo, invigilando, sollicitando, scribendo & rescribendo, quatuor vel sex imperiales designationi expensarum inferantur, eaque ad moderationem perveniat, quandoque partem vix quartam relinqui experimur. Lex Visitationis novissima prohibuit quidem eo nomine quidquam petere, quia ordo expediendorum Processuum esset præscriptus. Putamus tamen nos, (nescio, an satis ad mentem legislatorum) hanc legem ad alia tempora, & numerum DD. Assessorum majorem, & maturiorem Processuum definitionem respicere. Certe prout

prout nunc res sese habent, in tanto causarum numero, definitionum verò, cumprimis in causis arduis, mora, importunitati sollicitantium datur nonnihil. Qui non sollicitat, deseruisse causam creditur. *Dom.* Probe rem teneo. De moderatione, cujus supra mentionem injiciebas, nondum satis sum edoctus; an Advocatis & Procuratoribus nihil pro labore expectandum sit præter summam in moderatione expressam. *Jub.* Hoc tu experire si placet, spondeo, deventurum te mox, ut est in proverbio, Leberide nudiore. Esurire si nolis Advocatus & Procurator, accipere discas à clientibus, cum tua opera habent opus. Non fit expensarum moderatio, nisi ubi victori adjudicantur à parte victa refundendæ. Ergo moderationis finis est is, ut sciatur quantum, quod recuperat victor. Credisne, aliquem adeo futurum incivilem, ut, quæ causæ patrono interim honorarii loco dedit, repetere sit ausurus. Modum excedere quemlibet sua prohibet religio. Auditer jam hora undecima, quâ redire me oportet ad fores Cancellariæ quæsitum, an aliquid decretorum adsit ad supplicas, quas præteritis diebus & hodie, ut vidisti, Notario ordinario, quem hebdomadarium vocant, Protocollo rerum exhibitarum inscribendas, & ad Senatum deferendas tradidi. *Dom.* Abeamus ergo. *Jub.* Vides hic nomina Procuratorum præscripta, quibus decreta hodie data fuere in Senatibus. Hem! adsunt pro meo aliqua, quæ jam sum petiturus. *Dom.*

Dom. Utinam sint tibi exoptata ! *Jub.* Unum saltem satisfacit , cetera sunt dilatoria. *Dom.* Ego nullum

video Decretum in Supplica de quo adeo lætari videris.

Jub. Unum verbulum , quod hic vides *Erkennt* , in *Consilio* , addito die hodierno , sufficit : Hoc enim , toti petito Judicem annuisse , indicatur , & est Mandatum Sine Clausula à cliente valde desideratum.

Dom. Quænam utilitas à Mandato S. C. ? Solentne obedire confestim , quibus ita præcipitur ? *Jub.* De-

bebant vero. Si non fiat , habemus nostras formulas , quibus Exceptionibus contradicimus , petendo Mandatum arctius cum declaratione in pœnam. Quæ licet non decernantur illico à Judice , nihilominus usitatum

sequimur stylum. Deinde ea est utilitas , quod Processus Mandati S. C. ejus sit naturæ , ut præ aliis causis

maturatio decisionis juxta legem Judicii supremi expectetur. Persæpe quidem eadem morarum fata habent isti Processus ut alii , interim Procuratoribus sufficit , si functi sint officio suo.

Dom. Dicebas reliqua Decreta esse dilatoria. ? *Jub.* Sunt aliqua prælocutoria ,

ad aliquid ulterius producendum , aliqua literas infor-

matorias à Judice inferiore requirunt , qui modus hac tempestate plus quam olim frequens , cum primis in

Appellationis Processibus , Procuratoribus non satis placet.

Dom. Quamobrem ? *Jub.* Una est ratio , quod Appellans non expectare possit literas à Judice

Appellationi faventes , altera , quod Judex inferior

(M)

pro-



pronus sit ad executionem, si animadvertat superiorem Judicem de Appellationis necessitate dubitare. Sed huic rei est remedium: crastino die petendum, ut annectatur *temporalis inhibitio*. Tertia, quod si hac ratione causæ terminentur, non multum habeant agendum Procuratores: ut taceam sumtus Appellanti erogandos pro literis informatoriis, & Advocato pro elaborandis refutatoriis. *Dom.* Certusne es de *temporalis inhibitione*? *Jub.* Experiri licet. Si denegatur, apud Judicem inferiorem tentandum, annon mora imponi possit. Nisi partis studio ferveat, ipsis literis superioris pro informatione, quibus suspendi saltem Appellationis Processus videt, inesse eam vim arbitrabitur, ut, donec de superioris ulteriori Decreto constet, ab executione absteineat. Ecce aliud Decretum in quo Patronus meus uno floreno mulctatur, ob non additam supplicæ sententiam instantiæ primæ, cujus illa à quâ appellavit est confirmatoria. Sanè defectum hunc scivimus, sed restituet hunc florenum cliens, qui cum reliquis necessariis transmitti non fecit: Interim exhibenda fuit supplica, ne fatalia laberentur, neque inutilis est mora, quia culpa facile in Advocatum rejici potest, interim favore Appellationis fatalium prorogatio obtinetur. *Dom.* Cujusnam manu scribuntur hæc decreta, credo DD. Assessorum & Referentium? *Jub.* Minime, sed Notariorum Camerae. *Dom.* Suntne hi scribæ Judicii ordinarii? Nulline Secretarii? *Jub.* Olim alii



alii erant Secretarii, alii Notarii, sed jam dudum hæc officia sunt conflata, ita ut Notariorum Camerae munus sit idem, quod Secretariorum. Quemadmodum autem in aliis Dicasteriis varii sunt Secretariorum ordines, ita apud nos Notariorum. Alii Protonotarii, quibus incumbit expeditio Processuum decretorum, sententiarum publicatio & in Audientia publica unus ex Protonotariis, quem ordo tangit, ad mensam Notariorum supremo loco sedet. Tum etiam Protocollorum Pleni cura. Alii sunt Notarii speciatim ita sic dicti, qui vel in Senatibus deliberationes audiunt, vota & decreta protocollo inferunt, vel in Cancellaria supplicationes recipiunt, in protocollum rerum exhibitarum referunt, addito die & anno: Easque distribuendas quotidie ad Dn. Judicem deferunt. Hi inter se quavis septimana officia partiuntur & ideo vocantur hebdomadarii, omnibus verò præest Dn. Cancellariæ Præfectus, qui munera obeunda Cancellariæ Personis omnibus distribuit, eosque ad officia facienda, ubi opus admonet, & corrigit. *Dom.* Quare nominasti Notarios speciatim ita dictos? *Jub.* Ad differentiam reliquorum, Lectorum, sive Archivariorum, qui etiam Notarii creati sunt, quorum tamen omnium munus est neque in Cancellaria neque in Senatibus. Sunt etiam inter reliquas personas Cancellariæ aliqui Notarii creati. Potest aliquis esse Notarius Camerae sive Secretarius, qui tamen non est Notarius per Comitem.

tem Palatinum creatus. Horum officium non est, nisi sint requisiti. Camera Notariorum est constans, scit unusquisque, quid sibi quotidie agendum incumbat.

Dom. Audivi aliquando denominationem *Notarii simplicis* quam intelligere vellem? *Jub.* Dicitur *Notarius simplex*, qui à Comite Palatino est creatus & in matriculam Notariorum Cameralem non relatus. Hoc enim fieri non solet, nisi prævio examine accuratiori doctrinæ, in tali officio probatæ per exercitationem. Fit autem examen per duos ex Dnis. Assessoribus.

Dom. Ergo in numeros habet Camera Imperialis Notarios, quotusquisque enim est qui studiis suis confusus, ad matriculam referri non exoptet. *Jub.* Videris tu mihi existimare quod Notarii matriculæ inscripti sint iidem qui Notarii Camerae.

Dom. Certe hoc putabam, ergo clarius me docebis differentiam.

Jub. Notarii matriculæ inscripti examine prævio (quod etiam fieri potest per Commissarios, si petens matriculam sit absens, facta ab iis relatione cum testimonio bono) non habent idcirco officium aliquod in Camera, aut Cancellaria, hi enim sunt numero tantum sex aut pauciores, sed manent in patria sua vel alibi, ubi ex studiis vivere possunt.

Dom. Ad quid igitur matricula? *Jub.* Multum omnino. Primo, ad testimonium doctrinæ, deinde ad maiorem fidem in officio, nam plus tribuitur instrumento vel testimonio Notarii immatriculati quam simplicis.

Dom. Quare hoc? putat-



putabam à Comitibus Palatinis etiam examinari & jurejurando obstringi? *Jub.* Id quidem est verum: Sed quemadmodum interest inter Comitem Palatinum & Comitem Palatinum, ita inter Notarium & Notarium. In Camera Imperiali major debet esse rerum certitudo, doctrina mores & exercitatio perspecta. Porro, insinuationes Processuum, quorum executio à nunciis ordinariis interdum fieri non potest, Notario immatriculato committi debet, non simplici. *Dom.* Nondum satis didici ordinem quem tenent Notarii Camerae inter se in Cancellaria & Senatibus. *Jub.* Qui in Senatu sunt à manibus Protocolli, in Cancellaria alios labores non habent, satis occupati ad Protocolla ordinate conscribenda, si procrastinare aliquid nolint. Fides Protocolli debet esse inconcussa. Et hi non facile mutantur in Senatibus. Ceteri in Cancellaria labores habent distributos, & horum unus dicitur hebdomadarius, ceteri alias habent occupationes. Ille qui in Senatu est, eo finito, supplicas cum decretis inscriptis deferret ad Cancellariam, ubi per hebdomadarium traduntur Procuratoribus vel amanuensibus. *Dom.* Ita vero per notam manum Notarii facile est scire, ex quo Senatu decretum aliquod prodierit? *Jub.* Imo vero ille Notarius qui in Senatu fuit, decretum inscribit tantum illi exemplo Supplicationis quod in Cancellaria asservatur, (duo enim exempla cujusque libelli semper sunt exhibenda à Procuratoribus) al-
(M) 3 teri

teri quod Procuratori traditur, inscribitur decretum manu hebdomadarii, cui nequidem, ut audiui, copia datur Protocolli Senatus inspiciendi. Sed nescio an Notarii semper adeo sint tenaces inter se ipsos. Erga Procuratores sunt plerumque nimium, ut citius clavam ex manu Herculis extorseris, quam ab his quidquam quod scire nobis foret utile. *Dom.* Quam felices sunt Notarii quibus aditus datur ad Senatus, qui deliberationes audiunt & in utilitatem suorum studiorum convertere possunt quæ didicerunt! *Jub.* Omnino. Et ego si contigisset mihi in juventute tale officium, non optassem præstantius. Sed sciendum est, eos tantum fructus capere, qui fundamentis Jurisprudentiæ solidis non sunt destituti, atque ad altiora officia adspirant. Si per aliquot annos officio Notarii sunt functi, de promotione ulteriore ad alia officia sunt certi. Qui vero aliud non desiderant, contenti sunt, si qualitercunque munere fungi possint. *Dom.* Stetimus satis in hoc angulo plateæ, pergamus si placet, prætereuntes enim credent nobis hic nescio quid rei esse. *Jub.* Placet: *Dom.* Quem numerum studiosorum video nobis obviam venientem, crederem esse hic aliquem Professore à cujus Lectione ipsi veniunt. *Jub.* Similitudinem habet aliquam. Et habitat hic aliquis Doctor Advocatus & Procurator, qui adventantibus solet Processum Cameralem exponere. *Dom.* Est ne is solus qui in ea re adjuvat Studiosos? *Jub.* Sunt etiam

am alii ex Advocatorum numero, qui petentibus ea re officium præstare non recusabunt. Ad illum ve-
 frequentior est concursus, quia eo in studio nomen
 quisivit atque usum. *Dom.* Audivi sæpe Giessenæ,
 iod ex frequentatione musæorum Procuratorum
 agna capiatur utilitas: Si Acta integra Cameralia non
 at penes Procuratores, quidnam discitur in musæis?
sb. Vident, quibus aditus permittitur, Protocolla,
 modum Recessus componendi, Supplicas formandi
 t in ordinem redigendi, brevi: *Schlendrianum* fo-
 nscem. *Dom.* Sæpe de hoc Magistro audivi, vel-
 m & ego eum audire. *Sub.* Poteris si volueris, sed
 m est prandii tempus, postea Audientiæ, & com-
 onendæ mihi sunt Tabellæ sive Designationes Recess-
 um, redibis si placet hora prima, & comitaberis me
 l Audientiam, in qua cliens aliquis noster Judæus,
 iramentum publice præstabit. Non ipse quidem sed
 r alium Judæum qui ordinarius esse solet mandata-
 as, & satis obduratæ frontis. Neque enim Christia-
 is à Judæo mandatum ad jurandum accipit. In-
 gna res foret jurare, etiam mandatario nomine eo-
 m, qui non verentur pejerare, si agunt adversus
 hristianum: *Dom.* Non sane negligam hunc actum
 sservare. *Sub.* Scis jam ubi meus sit locus, ubi
 us, finita Audientia quæ hodie est ordinaria i. e. sine
 ntentiarum graviorum publicatione præsentè Domi-
) Judice & pluribus Assessoribus, observata abs te
 recen-

recensebis. *Dom.* Quidnam hic ex fenestra Auditorii, per Pedellum in publicum proclamatur? *Jub.* Bene hoc observas. Proclamata quæ audisti hodie adversus non comparentes in Sententiis decerni, per Pedellum proclamantur: *Dom.* Quibus verbis? Nimirum festinanter loquitur iste. *Jub.* Repetit Sententias singulas, Proclamatum ex. gr. *In Sachen N. wider N. Citat. ist das Ruffen hiermit erkannt, & addit* Pedellus ad unamquamque sententiam: *Zum ersten, zum andern, zum drittenmal.* *Dom.* Quis effectus cujus rei? *Jub.* Ut in contumaciam contra Reum procedatur si à die publicatæ Sententiæ intra dies sex Audientiarum non compareat. *Dom.* Si ergo hoc sciunt Procuratores, quare non comparent in tempore. *Jub.* Si mandatum non habent, comparere non possunt. Si habent, interest quandoque magis, florenum, qui Pedello debetur, pro Proclamato exsolvere, qua ratione purgatur contumacia, quam ante publicatum Proclama comparere. *Dom.* Vidi & audiavi res quas nunquam alias didiceram. Observavi actum Juramenti Judæi, memini tamen me audivisse Judæos jurantes consistere debere in corio porci, quod tamen hic non vidi. *Jub.* Ad antiquas fabulas hoc pertinet. Hæc quæ vidisti, & non alia solennia observantur. *Dom.* Mira sunt mihi ista omnia. Allocutio Protonotarii, responsio Judæi, quam tamen ubi maledicti nominantur, non erubuit effari: quod
caput

aput pileo tegat : denudatum brachium , decalogo
 lebræo imponens , & reliqua. *Jub.* Ita res est , &
 ege Camerali verba omnia sunt præscripta , quæ tibi
 ic legenda evolvam : ceterum istos clientes non
 gre ferimus , quia largius solvunt , & promptius.
Dom. Observavi præter confessum solennem , Dn. Ju-
 icis & quatuor Dnorum. Assessorum reliqua omnia
 le eadem quæ nuper fuere à me notata. *Jub.* Recte
 icis , neque alius esse modus debet. Audisti tamen
 iquas Sententias publicari : Actorias , Proclamata &
 ias levioris momenti , definitivæ enim ad solennem
 ublicationem reservantur plerumque. *Dom.* Audi-
 i , sed oblitus sum sciscitari , num iidem Assessores
 ublicationi , vel solenni vel minus solenni , adsideant ,
 ui fuere Sententiarum auctores vel earum causarum
 ferentes. *Jub.* Minime , nisi id fiat ex accidenti ,
 am non alii Audientiæ adsident quam quos ordo tan-
 it , quem observare & monere , officium est Pedelli.
Dom. Putarem istas circumcurstationes auscultantium ,
 c colloctiones corrigi debere. *Jub.* Colloctiones
 eri submissa voce , reverentia exigit , circumire
 portet , nos cumprimis , quia habemus cum aliis Pro-
 uratoribus communicanda. Id tamen ne fiat cum
 repitu , monet quandoque Pedellus jussus ab Asses-
 ore præsentem. *Dom.* Audivi aliquoties Procuratores
 : invicem interrumpentes inter perorandum , puta-
 am id decorum non esse. *Jub.* Interruptiones istæ
 (N) in-

indiscretæ valde displicent Procuratoribus senioribus & optarunt à Superioribus modum poni. *Dom.* Qualem vero modum? *Jub.* Aliquando Recessui cuidam contradicitur è vestigio, & quidem verbis brevissimis, quod est tolerabilius, & inhæret alter suo petito per vocem *Priora*. Prolixiores Recessus ad calamum dictari ægre ferunt & Assessores & Notarii. Alia irrepserrat consuetudo interrumpendi, quando forte seniorum aliquis absens juniorem substituisset ad Recessum publice legendum. Cum itaque unusquisque in suo ordine etiam per substitutum, audiat, accidebat sapius, ut junior ille substitutus alium seniorem, qui vix perorare incoepisset, interromperet: *Pro Domino Doctore N.* Huic rei inprimis remedium fuit adferendum. *Dom.* Explica quo modo? *Jub.* Post Decretum generale Anno 1723. ipsi juniores Domini, si ab aliquo seniore rogati sunt ad legendum pro ipsis Recessum, hoc mature indicant, non verò expectant dum aliquis ex sequentibus in ordine assurrexerit & dicere incoeperit, qui deinde interpellatus, audito nomine Procuratoris in ordine præcedentis, confestim, & cum rubore aliquo, retrahere orationem suam debeat. *Dom.* Juramenta Appellationis à sex Procuratoribus una vice, præeunte verbis Assessore, præstari observavi. *Jub.* Ita fieri solet si plures sint qui Processus Appellationis reproduxerint. *Dom.* Vidi aliquem prodeuntem, & Assessore sceptrum porrigente, hoc

hoc manu tangere, confestimque ad suum locum redire? *Jub.* Cautio sic præstatur judicialis de producendo Mandato Procuratorio. *Dom.* Nihil tamen turibus percepi de hac cautione. *Jub.* Hoc inde est, quod Recessus celerius, & à nonnullis voce magis quam quæ exaudiri possit, submissa, recitantur. Qui clare & distincte non loquuntur, audiri non velle putares. *Dom.* Hoc vero quare non corrigitur. *Jub.* Quia hominum mores sæpe corrigi nequeunt. Finienda est hodie nostra conversatio, quia in Audientia hodierna magnam copiam accepi Recessuum adversariorum, qui Protocollo inferendi. *Dom.* Gralias tibi debeo pro amica informatione. Vale igitur quam optime, amantissime mi Jubenti, & favere mihi perge.

COLLOQUIUM TERTIUM.

Jubentius : Domitius.

Jub. Salve Domiti, putabam te ex vicinia discessisse, cum per semestre fere spatium abs te nihil literarum ad me pervenerit, nec tu ipse huc advolaveris. *Dom.* Salvum te esse lætor, exoptatissime Jubenti, quem invisere non neglexissem, nisi fuisset per crumenam impeditus. Ad epistolas autem scribendas

das meministi olim Studiosis non multum superesse temporis à Collegiis , à lucubrationibus , à prandio , ab exercitiis à deambulationibus &c. &c. *Jub.* Videris mihi solito pallidior , neque commoda uti valetudine. *Dom.* Equidem non puto , & bene me valere hesternus dies docuit , qua non nihil crapulae expertus sum , reversus domum à sodalibus. Opus enim habent alterna requie lucubrationes. *Jub.* Suspicio in convivio anniversario. *Dom.* Equidem de tali convivio nihil scio. *Jub.* Moris esse dicitur ut in die Martini Studiosi honorarium aliquod extraordinarium conferant iis , quorum mensa utuntur , pro quo vicissim excipiantur convivio. *Dom.* Dum ego fui Giesæ talis convivii non memini. Ajunt jussu Principis morem esse sublatum. Quidquid sit ejus rei , studiosa juvenus legem sibi ferri non patitur ne ipsi inter se convenire velint & quandoque , ut eripiantur curæ , juxta Poëtam *Ovidium* , compotent. Sed ut mei adventus causam tibi amice exponam , subripui ego heri inter pocula alicui ex commilitonibus manuscriptum aliquod lepidum sub titulo *Schlendriani* , quod per incuriam ex veste ei excidebat. Hoc tecum communicare volui , cum in novissima nostra confabulatione *Schlendriani* feceris mentionem. Putavi itaque in Thesaurum me incidisse , cujus sine alterius damno , nescio an etiam sine invidia , possim fieri participes : Nam retinendi animum non habeo , sed Domino suo restituen-

audi, posteaquam exemplum mihi confecero de manu mea. Et faciam citissime, dummodo abs te dicerim qualis scripti possit esse usus, & an ei tutò sit dendum. Ego quidem observavi in Lectione fugitiva, multa quæ ad Praxin Cameralem pertinent in eo contineri, sed dubito, an auctor gratiam magnam occe scripto sit initurus. *Sub.* Quod tu mihi tanquam novi quid adfers, ego jam dudum vidi, & auctore dum hic esset, usus sum familiariter. Is Procuratori nulli erat addictus, sed numerabatur inter eos, quos vulgo Practicantes vocant, id est Studiosos, qui addiscendæ Cameralis praxeos gratiâ hic commorantur, quorum quandoque sunt totidem vel plures, quam in vestra Academia. Auctor iste juxta solidiorem doctrinam Jurisprudentiæ, studiis etiam elegantioribus à juventute erat imbutus, & quæcunque poterat, rimabatur. Accessum sibi ad mûlta Procuratorum paraverat per commendatitias literas, sed um curiosior esset quam ipsis placeret, non semper acceptus erat ejus adventus. Aliquoties à me monitus uir, ne scrutaretur nimium quæ scire necessarium non erat, sed ipse arte sese insinuandi non destituebatur: Sunt enim, quos abesse mallems, quibus tamen vel aditum præcludere, vel eos expellere honeste non possumus. Tandem, ut erat ingenio felici, informatus, quantum sibi opus esse crediderat, discessit, & jam in patria officio publico fungitur. *Dom.* Optas-



sem itaque ut in præcedentibus conversationibus nostris hoc scriptum non celasses. *Jub.* Equidem non celavi, sed tibi adhuc utile fore non credidi. Posset enim quis, nisi scopum Auctoris intelligat, eo male uti.

Dom. Mihi videtur esse satyra magis, & in detrimentum eorum, qui causas tuentur, compositum.

Jub. Ita putabunt qui de re ipsa, sicuti tu informati non sunt. Abusus foret istius schediasmatis insignis, si quis ea, quæ Auctor ceu regulas Schlendrianicas tradidit, imitanda esse crediderit. Is enim scriptionis scopus nequaquam fuit, & habendæ gratiæ Auctori, quod novitios ab erroribus revocaverit, methodo hac arbitraria.

Dom. Annon igitur ista, quæ ibi narrantur, in ipsis rerum argumentis obtinent? *Jub.* Im-

perite quæris mi Domiti. Quotusquisque enim est ex nostratibus Dominis Advocatis & Procuratoribus, qui officii sui dignitatem & rationes non calleret longe rectius: Ego plane aliter sum persuasus, & meliora experior quotidie.

Dom. Qui fit ergo, ut ab Auctore schediasmatis hæc quæ reprobanda magis essent, tanquam regulæ instructivæ tradantur. *Jub.* Ex triv-

vio meministi haud dubie, quid sit figura Rhetorica, quæ dicitur Ironia. Scias igitur, Auctorem scripti isto modo docendi, quo olim Erasmus Roterodamus & alii feliciter usi sunt, vivis coloribus ea depingere voluisse, quæ vitanda potius, quam imitanda esse putaverit.

Dom. Putarem ego Auctorem parcere debuisse

uisse verbis, ne de causarum patronis forensibus aliter quam par est credant de rei veritate non satis edocti. *Sub.* Male omnino iudicas. Officium Advocatorum & Procuratorum Auctor non descripsit, sed, quod tale non sit, vel esse debeat, dicere voluit. Fallentur etiam maxime, qui sibi imaginarentur, consilium Auctori fuisse, detegere ea, quæ ipso facto ab Advocatis & Procuratoribus fiunt. Aliud enim monstrat scripti titulus. - *Dom.* Explicationem pleniorē huius rei abs te expecto. *Sub.* Observavit Auctor, & sæpe in familiari colloquio mentem ejus intellexi, multos ex Studiosis Wetzlariam venire, fundamentis jurisprudentiæ non satis imbutos. Error enim est frequentissimus, Praxin forensē, Cameralem cumprimis, addisci posse sine solida Juris cum civilis tum publici Imperii doctrina. Praxis sine fundamentis theoreticis similis est Charletaneriæ, hac enim, à Galca lingua mutuo sumpta voce insignire voluit eruditum *ἡμετέριον* celebris nostri temporis Polyhistor. Theoria sine Praxi proxime accedit ad Pedantismum, quem descripsit *Ulricus Huberus*, Iustus eximius Frilicus. Cum ergo multi Studiosi ea, quæ externe fieri observant, pro captu suo intelligant, incidunt facile in errorem duplicem: Unum, ac si in externis istis officium Advocati & Procuratoris consisteret, & nihil esset facilius quam tali munere fungi: Alterum, quod a, quæ fieri audiunt, animo lites protrahendi acci-

dant,



dant, qua in re male omnino judicant. Hos errores Auctor Schlendriani stylo ironico notare voluit, eo fine, ut Practici novitii ad solidiora discenda incitarentur, & in istiusmodi modis agendi boni Advocati & Procuratoris officium non consistere, imo summo-
pere vitanda esse, intelligerent. *Dom.* Nihilne eorum actu fit, ut descripsit Auctor? *Jub.* De occultis respondere non possum: Si quid accadat, & incaute, ut intelligatur, poenam secuturam certum est. Si apertum non sit, in meliorem partem fiet interpretatio. Externa species imponere non debet. Consilio malo non fieri, credere libenter volo. De meo Procuratore facilius adhuc spondere possum. Et de plerisque quos propius nosse licuit, licuit autem plurimos, scio, quod alia plane sint industria & doctrina viri. *Dom.* Videor mihi jam ab errore, in quo fui, liberatus esse. Credo tamen hac ratione plura reprehendi potuisse vitia *Schlendrianica* quæ Auctor prætermisit. *Jub.* Nullum est dubium, si cujus mentio nusquam est, se dolet excludi, properet, sat erit locus illi. *Dom.* Versusne tu loqueris ex tempore? *Jub.* Minime, sed memineram hic versuum, in fine libri cui titulus *Navis Stultifera*. Eum ex annici Bibliotheca perlustrandum accepi: Inspice si placet: *Dom.* Et literarum & imaginum ligno incisarum forma, antiquitatem libri indicant: Auctoris nomen non video neque annum editionis. *Jub.* Animad-
verte



verte tituli partem supremam ab imperitis, forte pueris quibus imagunculæ monstratæ, esse laceratam, sed adhuc conspicuum nomen Auctoris *Sebastiani Brand*, (latine vocabatur *Titio*) Argentinensis & Reipublicæ Patriæ Proto-Cancellarii, cujus laudes ex *Pauli Langii Chronico Citicensi* repetit *Hertius in Bibliotheca Germanica num. 1278*. Tradidit autem Philosophiam moralem ea methodo, ut vitia hominum tanquam Stultitiæ plena in unam compingeret navem. Opus vernaculæ linguæ versibus conscriptum, ab aliis Latinitate donatum varioque carminum elegantissimorum genere illustratum fuit, prout hic vides. *Dom.* Annus quem a fine libri jam deprehendo MCCCCVI. videtur esse suspectus, nam eo tempore artem typographicam nondum coepisse in Germania memini me legere in *Historia Literaria Struvii*. *Sub.* Nisi de vita & morte *Citisionis* constaret aliunde, vivere enim desiit Anno 1521. putandum foret, more typographorum veterum non referri annum editionis, sed absoluti operis manuscripti. Ast, cum Auctor Anno 1406. nondum natus, dubitandum non est, errore typographi positum esse Annum MCCCCVI., aliam vidi recentiori charactere editionem, cui additus Annus 1497. *Dom.* Memoratu digni sunt versus in titulo :

*Quamquam Stultifera mihi vox est indita navi,
Sana tamen tuto mens mea vela leget,
Non etenim doceo quemque insanire, sed hortor
Ex moneo insanum &c.*

(O)

Sub.

Sub. Pariter non docere voluit Auctor quemque Schlendrianice agere, sed monere juvenes, hanc non esse viam, & Praxin quam sibi forte imaginantur.

Dom. Quid ergo tandem erit *Schlendrianus*, quem ubique locorum nominari & commendari audio, operam dandam esse, ut Schlendrianum addiscamus: in existimatione esse, qui eum bene noverit.

Sub. Verrum dicis, vulgo & commendari & laudari, sed sciendum tibi est, fieri hoc non eodem ab omnibus sensu, diversa quoque esse hominum & studia & ingenia. Commendant sæpe aliqui laudantque aliis, quod, quid sit, ipsi nesciunt: Aliqui consilium dant pro ratione ingenii ejus, qui petit. Est enim, quod dolendum, tanta hominum copia qui legum studio vitam sustentare volunt, ut non possit non fieri, quin major numerus sit eorum, quorum profectus infra mediocritatem manent, paucissimi ad solidiorem scientiam ascendunt. Illi, si Justinianum accusent, se ipsos culpare potius deberent, quod, priusquam ad studia liberalia accesserint, suas ingenii vires in examine non habuerint. Hinc accidit non paucis, ut contrarium experiantur, quam quod Justinianus Cæsar in epilogo Novellæ primæ sperare jussit, si cum vulgo textum hunc de studio legum in genere, accipere liceat.

Dom. Parum abest, quin poeniteat me jam incepti studii juridici. Obfirmabo tamen patientiam. Tu vero, amice, quem tenere debeam verum de *Schlendriano*



driano intellectum explicare memento. *Jub.* Faciam libenter, quantum possum. Ante omnia cavendum, ne intelligantur artes Rabulariæ, quam acceptionem reprehendit Schediasmatis Auctor. Ex enim honestos viros non decent, & nullus est Dnorum. Advocatorum & Procuratorum Camerae, qui tales non averferur. Si ullibi, certe hic loci, severa foret in eas animadversio. Semper habuit, & adhuc habet Camera Imperialis in Procuratorum ordine viros doctos, tanto Judicio dignos, quorum complures, & inter eos meus quoque Patronus, honore & titulo Consiliariorum ab Electoribus, Principibus, ac Statibus Imperii sunt insigniti. Est inter eos, quod non diffitendum, inæqualitas: Sed quotusquisque est, qui æqualitatem ingenii, studiorum, morum, omniumque agendi rationum &c. quæsierit in quocunque Collegio? Deinde, deponendus est sensus *Schlendriani* vulgaris, in nudis externis formulis earumque imitatione qualicunque, vel potius abusu, consistens. Hunc risui habuit Auctor. Tertiò, si uti velimus isto vocabulo, plebejo magis, quam ad doctos pertinenti, nihil aliud significare puto quam scientiam applicandi promte in ipsa Praxi, regulas & formulas receptas atque probatas, atque cum judicio. *Dom.* Hæc autem tua descriptio longe aliter se habet quam Auctoris. *Jub.* Is in Schediasmate talem dedit descriptionem, qualem juvenes imperiti vulgo sibi imaginantur, non qualis re-

vera esse debet. Ut dicam quod res est, doctrina & peritia styli, id ipsum est quod *Schlendrianum* appellant. Vitio & imperitia hominum factum est, quod rem plane necessariam, stylum judicarium puta, vocabulo contemnitibili *Schlendriani* insigniverint. Credo id factum ab iis, qui tales sunt, quos Auctor Schediasmatis reprehendere voluit, h. e. qui imperitiam calliditate quadam obtegere didicerunt. *Dom.* Optarem ut similitudine aliqua hoc illustrares ad captum meum accommodata. *Jub.* Didicistine aliquando Geometriam? *Dom.* Fuit à juventute meum delectamentum. *Jub.* Probe. Et quam insignem præbeat usum in omni disciplina non dubitant nisi qui studio isto imbuti non sunt. Circinum tractare haut dubie fuisti doctus. *Dom.* Injucundum foret hoc studium sine exercitio circini. *Jub.* Id quidem fit in musæo super tabulam vel chartam. Sed si in campo aliquid peragendum tibi esset ipso opere: si juberis regulas architectonicas quæ Geometrico studio innituntur, ad Praxin deducere: auderesne id peragere sine periculo? *Dom.* Minime, quia nondum expertus sum: *Jub.* Intelligis jam differre scientiam regularum, vel in Legibus traditarum, vel styli, qua voce designantur regulæ usu probatæ non scriptæ, à peritia iis in ipsa Praxi utendi. *Dom.* Hoc bene capio. *Jub.* Ergo hæc peritia scite & promte tractandi negotia, cumprimis quoad externa, vocatur *Schlendrianus*.
Dom.

Dom. Disco jam multa, antea non audita. Si recte tua verba percepi, stylus à Schlendriano non differt, nisi in peritia adplicandi: *Jub.* Rectissime. *Dom.* Sine doctrina Jurisprudentiæ nullius est pretii notitia externarum formularum. *Jub.* Optime. Et cum stylus judicarius non sit absque ratione legitima, hanc qui ignorant, nequidem stylum scire crediderim. *Dom.* Qui ergo doctrina est præditus, huic notitia styli, qui ab observatione diligenti & exercitio dependet, non multum faceffet laboris? *Jub.* Bene judicias. *Dom.* Et facile poterit pro diversitate negotiorum casuumque occurrentium formulis uti, vel novas condere proprio Marte, observatis præceptis generalibus: Et omnia quæ sunt externa, pro re nata adhibere eaque moderari. *Jub.* Egregie rem tenes. *Dom.* Ego itaque Jurisprudentiæ operam dabo seculo, & spero me evalurum bonum Schlendrianum. *Jub.* Optime facies: & experieris insignem utilitatem. *Dom.* Conversationem hodiernam habeo quoris convivio cariorem. Revertar nunc domum, commilitoni meo scriptum restitutus, dataque occasione alios etiam ab errore revocaturus. *Jub.* Recte facies. Vale.



COLLOQUIUM QUARTUM.

Domitius : Jubentius.

D*Om.* Videone ego hic amicissimum meum J**ubentium** ? *Jub.* Salve Domiti charissime. *Dom.* Quamnam obsecro, fortuna te ad nos adduxit, cum sciam te in palæstra tua occupatissimum & maxime necessarium. *Jub.* Excurrere licuit feriarum tempore, & factum à me est, ut ante discessum meum te amicum inviserem. Serio enim jam ago consilium relinquendi officium, cui fere insenui. Quotusquisque enim est quem non tandem capiat desiderium interserviendi sibi. *Dom.* Credo, & meminisse te vulgati illius : *Sic vos non vobis &c.* Nihilne novarum rerum affers ex vicinia ? *Jub.* Equidem apud nos semper aliquid novi, sed quæ illic versantium curiositatem nutriunt, alibi degentibus minime satisfaciunt. Quid enim vestra referret scire, quales Processus novi introducti, decreti, reproducti, decisi & similia. *Dom.* Equidem non omnia scire placet quæ alibi agantur, sunt tamen aliqua quorum notitia non foret inutilis, vel saltem jucunda. Increbuit apud nos fama paucis abhinc diebus, rusticum aliquem ex vicino vobis pago, qui solitus erat venum portare galinaccos, in campo à satana esse abreptum, & quidem

em à latere uxoris quæ maritum comitata, vocem clamantis eminus audivisse dicitur. *Sub.* Proh! fabulam hanc etiam huc delatam audio. *Dom.* Fabulum! verissimum esse dicitur factum: deperditum nunc virum, qui hucusque non comparuerit: necesse ergo ut diabolus eundem habuerit in suam potestatem. *Sub.* Quasi vero homo levissimus ebrius aquis submergi non potuisset. Sane ut homines abripiat non opus habet diabolus, qui sponte ad eum veniunt. Vivi abducendi essent, multi tali supplicio forent digni, majori etiam exemplo quam iste *devides*, cujus cada- ver nuper à flumine redditum, postea terræ mandatum, ipse meis oculis vidi. *Dom.* In alio pago etiam icino viri cujusdam defuncti corpus à dæmone asportatum dicitur. *Sub.* Crederes tu ferme in vicinia nostra dominari plane dæmonia. Mirum, si non etiam meteoros quod conspicitur quandoque, draconem volantem dicunt, fabulæ ad te sint perlatae. *Dom.* Existimo dominium exercere ubique, dæmonem, licet non semper permittatur ei talia patrare. Consentes saltem, (est enim doctrina Apostolica) pontem esse malum spiritum in aëre. Quare de infestæ sortis hominibus ejusmodi facta frequentius au- untur, quam de dignioribus, indagatio non est nova. Sunt forte exempla alia quæ non evulgantur: Illata est hisce diebus relatio de muliere quadam Hun- garica, quæ mense Octobri anni proxime præteriti

in

in suburbio Dresdensi inventa examinataque, ubi terrarum esset, & quo pacto ex patria sua, plusquam ducentis stadiis à Dresda distante, eo esset delata, nescire se respondit. Fuisse autem se pridie ejus diei adhuc domi cum marito & liberis. Hæc omnia cum pluribus circumstantiis constanter affirmavit foemina, alias nec ibi neque in vicinia unquam visa, adeo ut falsi suspicio nulla esset. Ni fallor penes me adhuc est relatio Magistratus Dresdensis typis evulgata. Ecce eam, & quidem Ratisbonæ excusam. *Jub.* Mira res: sed forte dolus detegetur, vel alienatio mentis istius foeminæ, quam à puerperio vix egressam relatum lego. Dici non potest quanta sit imaginationis vis in freneticis. Ex mille historiis istiusmodi vix una alterave aliquid habet veri. Spirituum in corpora potentiam à multis in dubium vocatam, negare nolim, modus agendi plane est incognitus, neque enim unusquisque mortalium, qua ratione in corpus suum anima agat, scire potest. *Dom.* Et tamen ex medicorum nonnullorum principiis animæ rationali omnia corporis pathemata adscribuntur. *Jub.* Hac de re videant ipsi, litemque cum Cartesianis dirimant. Nihil interest, modo in arte medendi, quæ est mere experimentalis, convenient: Astrologorum alii terram mobilem, solem vero totius universi centrum statuunt, alii, antiquioris doctrinæ tenaces, systema invertunt, in calculo temporum tamen concordant utrique;

Utri-

Artem & Medici in præscribendis morborum remediis. *Dom.* Optandum hoc foret omnino. Contigisse tamen audiui, quod consilio Medicorum non inanimi & sententia plurium vincente, ægroti mortem obierint. In morbis vulgaribus artem non esse difficilem: Si quid extraordinarii occurrat, eos etiam qui peritissimi celebrantur, falli sæpissime, & periculum facere medicamentorum absque periculo suo. Ita scilicet abscondidit Creator Supremus causas rerum interiores. Sed de arte Medica satis. Fuit nuper inter nos Studiosus, qui in confabulatione *Monadologiam* deprædicabat, quam dicebat, juxta præcepta Auctoris sui, esse *doctrinam de Substantiis contemplantibus mundum universum*, & de *Monadum* speciei-
bus quatuor multa addebat mihi obscura. Videbatur iste nobis, ut scriptum est in Sacris, novorum dæmoniorum annunciator esse. Deum ipsum, quem adoramus non aliter definiebat, quam *Substantiam universa possibilis* unico actu *distincte seu adequate representantem*. Animam hominis, *substantiam universi representativam*, cujus representandi modus esset in corpore organico & ejus in hoc universo situ. Corporis vero, non humani tantum, sed cujuscunque rei creatæ naturam similem esse aiebat machinæ sive horologio, quod positis requisitis, aliter quam agit, agere non possit. Hinc etiam totum mundum describebat, *seriem possibilium simultaneorum & successuorum inter*

(P)

ter

ter se connexorum. Systema aliquod novum ex Idealismo & Mechanismo (quæ duo sunt pure contraria) conflatum, & non perceptibilem mihi harmoniam decantabat. Erant inter nos, qui has definitiones admodum paradoxas esse dicerent, & conclusiones Philosophiæ sanæ, ipsis etiam definitionibus repugnantes: quod homo motibus corporis, quos voluntarios & liberos esse dicimus & experimur, resistere non possit, sed efficiat eos necessario: motus omnes in corpore eodem modo quo jam eveniunt, eventuros esse, etiamsi non adesset anima, cum hæc per virtutem suam ad illos plane nihil contribuat: Animas extitisse ante corpora in natura elementari, easque in corpore humano demum ad naturam rationalem evectas esse: Eventus in hoc orbe terrarum, qui nobis sunt accidentia, ipse dicebat esse necessarios, ita, ut si per miraculum aliquod naturæ cursus ordinarius mutaretur, necesse foret ut omnia alia evenirent aliter in toto mundo, donec per novum miraculum restituta essent in statum pristinum: Et alia similia, notionibus nostris communibus, imo & Theologiæ Christianæ principiis adversa. *Sub.* De istis doctrinis novis Metaphysicis ego cognitionem sufficientem non habeo. Hoc ex recensitionibus eruditorum, quas interdum apud Dn. Procuratorem patronum meum legere conrigit, intellexi, quod doctrinæ tales à multis graviter impugnentur, & juvenes, ut ab iis tanquam pericu-



riculosissimis sibi caveant, moneantur. Mihi quidem vacatio non datur ad ea examinanda curatius, ipsa tamen quam adfers, Domiti, descriptio, nisi tota res abeat in logomachiam, videtur parere consequentias perabsurdas, proinde fugienda potius esse quam confectanda istiusmodi nova theoremata.

Dom. Ego etiam quid proficui ad Christianam Religionem, ad bonos mores & Rempubicam attulerint, vel adferre possint, non perspicio. Risimus nos egregie, cum iste, quem dixi Studiosus, credo ex ideis suis metaphysicis quibus penitus erat deditus, asseveraret, aurifabrum quendam, in cuspide acus minimæ, turrim equitum artificiose & distincte expressisse. In grano arenæ numerum plusquam ducentorum animalium viventium consistere posse. Mittamus sterilia hæc somnia. Nihilne apud vos novæ rei? Putarem apud vos, ubi tot homines diversarum dignitatum commorantur & vos invisi sunt, accidere alia scitu jucunda præter causarum litigia.

Jub. De hisce rebus ego parum sum sollicitus. Otiosis hæc relinquenda, quorum assatim sunt in urbe nostra, qui studiorum loco, quæ vix degustant, operam dant narratiunculis, quas deinde alio deferunt, ut videantur de rebus Cameralibus bene informati si Diis placet!

Dom. Haud dubie fidem non invenient apud prudentes.

Jub. Prout occasio fert, & hominum sese offerunt ingenia. Novissimum est inter nostrates, quod Serenissimus Julex Cameræ Princeps Fürstenbergius

relicturus sit hoc officium, neque adhuc certus successor. Interim de augendo Dnorum. Assessorum numero spes est proxima. *Dom.* Oportetne ex ordine Principum Imperii Judicem Camerae eligi. *Jub.* Hoc putant ii tantum qui Jus Publicum & Historiam nesciunt. Primus Judex Camerae fuit Comes Zollernus. Sequebantur alii ex ordine mox Principum mox Comitum Imperii: Hi sunt, ex quibus Principes fiunt. Nescisne tu quod Cæsaris sit Judicem constituere? Et clara est hac de re Legis publicae dispositio. *Dom.* Bene est. Aucto deinde Assessorum numero sperare poterunt litigantes maturiorem causarum decisionem? *Jub.* Nisi etiam lites, quarum est numerus permagnus, quotidie augerentur. *Dom.* Oblitus fueram de mutatione Ministrorum Ecclesiae apud vos facta, percontari. *Jub.* Ita est factum. Ille enim, de quo antehac inter nos sermo fuit, ad aliud officium vocatus, discesserat, primus in ordine vero morbi violentia è vivis erat ereptus. *Dom.* Hæc etiam huc pervenit fama, & per malignam febrem extinctos apud vos aliquot homines brevi temporis. *Jub.* Non mirum si quid pejus accideret. Tanta est illic pro securitate procuranda, quantum prudenter fieri potest, & aliorum docent exempla, incuria. Nullus mendicans importunus, nullus vagabundus prohibetur urbis ingressu. *Dom.* Fuit haut dubie facile invenire Ministros novos. *Jub.* Ea in re deesse non solent monentes & pressantes.

Jam



Jam peracta res est. Suffecti duo novi, quorum primus in ordine vocationis, à Domino Decano Canonicisque Catholicis & quibusdam ex Senatoribus civitatis electus in Parochum civitatis, per Dn. Decanum ritu solenni ad officium fuit inauguratus. *Dom.* A Decano Catholico Augustanæ Confessionis Parochus?

Jub. Nihil certius. Adstiterè Senatorum urbis aliqui, tum vero Canonici, præcedenteque stipulatione nonnullorum articulorum quos in confluxu hominum & strepitu audire non potui, tum vero imposita capiti manu, facta est benedictio. Ille verò ritus in antiquissima aliqua conventionè fundatus esse dicitur, quæ de re judicent alii. *Dom.* Hic ergo Parochus ita inauguratus pro vero Sacerdote habebitur etiam à Catholicis? Scis enim alioqui hos solos Sacerdotium sibi vindicare.

Jub. Sciscitari non licuit eorum sententiam. De eo sum certus, consuetudinem illam inaugurandi, si vera est, non officere quidquam reliquis Ecclesiæ Ministris legitime receptis, quo minus æqualem habeant potestatem, juxta verbi divini normam Sacra administrandi. *Dom.* Ita vero neo-electus nihil videtur habere præcipui, nisi sit fortassis in salarii quantum.

Jub. Ut narratum audiui, omnis ista electio & benedictio est mera sollemnitas antiquo more servata. Nam neque directorio in rebus Ecclesiasticis & Parochialibus utitur iste electus præ ceteris Collegis, quod ex antecessore ipsius me intellexisse aliquando reco-

gito, neque Salario fruitur, qua Parochus Ecclesiæ, largiori. *Dom.* Quare ergo retinetur solennitas hæc inutilis? *Jub.* Crediderim quod Magistratus civitatis facile sit passurus abolitionem; si liceret per collegium Canonicorum. Hos enim repugnaturus esse non dubito. *Dom.* Putant forte distinctionem sacrorum aliquando cessaturam & statum priorem, qui fuit ante reformatam Sacra, reductum iri. *Jub.* Hoc an expectent in posteris futurum, ego scire non possum. Historiæ si credendum, fuit ante introductam in urbem Confessionem Augustanam, Parochus urbis unicus, ex collegio Canonicorum eligendus. Postmodum verò in possessione reddituum Parochiæ norma observanda fuit, quam Pacificatio Westphalica sancivit, parte potiore apud Canonicos manente: Minor itaque Magistratui relicta, aucto numero Ministrorum Ecclesiæ, inter hos est divisa. De his omnibus notitiam certior, cum mea nihil referat, adquirere non studeui. Videbantur tamen rerum periti, à quibus ea quæ dixi accepi. *Dom.* Unum adhuc scire vellem: si nihil habet præcipui is qui in Parochum urbis est electus, perinde etiam erit, quis ex Ministris Ecclesiæ præsentibus eligatur. *Jub.* Quantum ego scio honor hic delatus est semper ei qui in officio fuit senior. Hic an propterea magis ministrum verbi divini (nam Sacerdotis appellationem sensu Romanæ Ecclesiæ non admittunt Theologi nostrates) se esse existimaverit, ego suo



suo relinquo loco. *Dom.* Quid verò si eligeretur aliquando in Parochum is qui est in officio junior?

Jub. Quoniam reliquorum Ecclesiæ Ministrorum officium est æquale, non existimo quod ex iis junior supra dicto ritu electus prærogativam ordinis sit affectaturus, nisi simul suspicione gravi ambitionis vanissimæ semetipsum onorare voluerit, &, quæ exinde sequeretur, animorum alienationem pluraque incommoda experiri.

Dom. Nullane in electione Ministrorum Ecclesiæ Augustanæ Confessionis partes sunt etiam Dominorum Cameralium?

Jub. Non satisfacere tibi possum hac de re, consulam Dnum. Procuratorem meum & alia occasione ejus sententiam ex me scies. Cum de electione cives inter se deliberarent congregati, parum absuit quin ventum esset ad manus inter quosdam opifices.

Dom. Non mirum hoc, quando etiam sutores ultra crepidam, & laniones ultra ilia sapere sibi videntur. Desiderio capior propediem ad vos me conferendi & ulteriorem adquirendi harum rerum notitiam. Ergo tunc ea de re plura confabulabimur. Quale nam scriptum tunica tua superne reconditum geris? videtur esse Disputatio aliqua Academica.

Jub. Nondum invisi quenquam sed mecum asportavi Schediasma quod inscribitur *Schlendrianus*, de quo olim sumus confabulati. Id nescio quis ardelio transferre ausus est in linguam vernaculam. Ecce translationem & quidem typis mandatam.

Dom. Video, sed
quid



quid ea in re peccatum fuerit, nondum intelligo. Vertuntur enim multa scripta ex latino idiomate, vel aliis peregrinis, in Teutonicum. *Jub.* Verum hoc est quidem, & ex translationibus nonnullis capi potest aliqua utilitas, ut nimirum scriptum aliquod ob præstantiam materiæ, etiam ab iis legi possit, qui præter vernaculam nullam didicere linguam: Vel pro exercitio styli. Nullius verò usus esse potest versio Schediasmatis.

Dom. Perge quæso declarare tuam sententiam. *Jub.* Est inquam, aliqua librorum species ita comparata, ut non nisi in lingua, in qua sunt conscripti, legi debeant, vel quod materia in vernacula commodè explicari nequeat, vel quod forma & stylus ab auctore electus alii linguæ non respondeat. Declarabo rem exemplis. Inconsultus foret sane qui Commentarios ad materias Juridicas latine conscriptos traderet lingua vernacula. Qui latina nescit, imperitus manebit, licet in vernacula sua tales libros legendo devoraverit. Scienti latina sordebit translatio in vernaculam, quantacunque accuratione sit elaborata. *Dom.* Hem! quam multi sunt libri Juridici Teutonice conscripti & valde accepti. *Jub.* Inter multos pauci boni. Et hi non translati ex latino idiomate, sed in vernaculo conscripti. Ita enim auctor stylum ad materiam & lectores attemperat: Lucubrationes de Processu Ludovicianæ germanica lingua conscriptæ omnibus fuere & merito sunt commendabiles. Ita & Mevii de Contractibus usurariis & simi-

similes. Si quis Commentarium aliquem ad Pandectas, vel si mavis, integrum Corpus Juris Teutonica lingua donare vellet, quis non admiraretur hominis insaniam? Leges publicæ legendæ & relinquendæ sunt in idiomate, quo sunt conditæ, nam translatio quæcunque privata ab errore non est immunis, neque ad eam licet provocare. Habet unumquodque idioma vim verborum propriam, quam alia lingua exprimere sciunt non nisi utriusque peritissimi & usu rerum exercitati.

Dom. Consentio hic quidem, sed aliud objectum est schediasmatis nostri: Infinitæ extant translationes libellorum historicorum & moralium. Nonne inter hæc scripta numerabitur? *Sub.* Extant etiam Epistolarum Ciceronis, Cornelii Nepotis, Q. Curtii & similes. Quo labore, nisi exercendi styli germanici gratia susceptus fuerit, parcere potuissent auctores, vel saltem sumtibus typographiæ. Qui enim istis subsidiis latinam linguam bene didicerit, an inventus sit unquam, hoc scient alii. Mihi nunquam arrisere.

Dom. Videris mihi contemnere versiones librorum ad unum omnes. *Sub.* Si exceperis libros sacros, & ex historicis paucos, non admodum aberras. Pauci enim sunt interpretes boni & periti. Adeo ut nequidem auctor omnis suum scriptum in aliam linguam transferre sciat commode. Deinde id certum est, non omnia scribi omnibus. Neque omnia sciri debere ab omnibus: Sunt, quæ vernacula lingua legi non expedit.

(Q)

Et

Et qui talia vertit æque reprehendendus, ac si quis lascivum Petronii Satyricon interpretaretur germanice. Tenet enim insanabile multos scribendi cacoethes, (meministi credo ex Poëta *Juvenali*) ut nihil non chartæ illinire vereantur homines otiosi. *Dom.* Perge tandem dicere de versione Schlendriani. *Jub.* Auctor scripti si credidisset expedire, Schlendrianum germanice tradere potuisset. Verum ille ad illotas manus pervenire non voluit. *Dom.* De ipsa versione quidnam sentis. *Jub.* Dicam tibi paucis: est absurdissima, stultissima. Versatum putares, quod in proverbio dicitur, asinum in unguento. *Dom.* Mirum igitur inventum fuisse obstetricantem Typographum vel Bibliopolam? *Jub.* Neceesse est fuisse avarissimum, lucelli ex re aliena quærendi cupidissimum, sed simul imperitissimum & impudentissimum, qui non erubuit etiam per diversoria & ostiatim emtores stultæ suæ mercis emendicare. Hinc in mandatis mihi dedit Auctor ut dissensum suum testarer publice, & apud vos novam accuratam editionem, insertis passim ab ipso mihi transmissis additionibus & emendationibus, quo magis coërceatur, & interpretis istius ineptissimi, imo plagiarii, lascivia, & Bibliopolæ avaritia. *Dom.* Varia audivi de schediasmate judicia, probarunt alii, alii murmure exceperunt. *Jub.* Scio, neque aliam fortunam talia scripta habere solent. Majori tamen parti lectorum, & iis quidem prudentioribus,

ribus, probata fuit & materia, & errantes ad rectam
viam reducendi, sale modico adspersa methodus.
Nosti, quomodo cecinerit Poëta : *

*Dummodo sic placeam, dum toto canter in orbe ;
Quod volet, impugnent unus & alter opus.*

Dom. Relatum fuit mihi, litem Auctori intentatam
fuisse à quibusdā. *Jub.* Legerant hunc aliqui male
docti forte libellum, bellaque crediderant esse parata
sibi: Hinc orti strepitus, quos se non tangere sensit Au-
ctor, sed ipsis. Tantum abest, ut adversus obtrecta-
tores digladiandum sibi fuisse putaverit, ut potius vi-
tiligatores proprio ense miseretur confossos. Me-
mini cum in Academia versarer, pictorem aliquem
studiosorum quorundam mores imagine, ad modum
Tabulæ Cebetis Philosophi, expressisse, in qua facies
& actiones permultæ, sed nonnullæ insigniter defor-
mes conspiciebantur & agnoscebantur. Hæc pictura
cum inter alias publice esset venum exposita, plerisque
verum artificis scopum intelligentibus & inventioni ar-
ridentibus, erat qui adversus picturam & artificem
voce clamorosa exurgeret, non esse ferendum, ut talia
publice proponerentur, vindicandamque factam sibi
& aliis injuriam. Accedebant huic, ut fieri solet in
turba, alii. Revocati tamen à plurimis sapientioribus.
Ridiculum esse si quis quidquam ex pictura illa sibi
congruere quereretur, propriæ enim turpitudinis actu-
(Q) 2 rum

* Ovid. R. A. vers. 363. seq.

rum esse præconem. Narrabatur historiola alia de pictura, quæ puellarum poëticarum trigam de quibus agit Seneca *lib. 1. de Benef.* repræsentabat, inter eas pictor, (an malitiose in medio relinquo) unam deformem in partibus quæ vestibus ornantur, effinxerat. Virgo quædam, alioqui perculsa, defectus suos in imagine reiectos indignata, de pictore male tractando consilia iniit. Consulere amici ut taceret: De vitiis corporis non nisi voces auditas susurras, cum tempore transitorias. Campanam si moveret ipsa, omnibus apertum fore & certum, quos haberet defectus occultos.

Dom. Prudentissime. Fuit hic aliquando artis opticæ peritus, qui speculum monstrabat facies mirum in modum nasutas repræsentans. Erat aliquis inspiciens prægrandi naso, qui artifice insultare velle videbatur, nisi à prudentioribus esset revocatus. *Jub.* Proinde qui Schlendrianum sibi artique suæ respondere criminatus fuerit, is in dorso suo Nemesein hædere confitebitur.

Dom. Solent tamen eruditi scriptorum publice editorum facere censuram, mirarer, si non de hoc scripto nonnihil comparuerit? *Jub.* Censuram factam esse publice non scio, & operam talem nemo prudentum puto esse occupaturum, qui in censendo hoc scripto inutilem captaret nominis gloriam. Sunt equidem multi, qui, cum agnoscant se non esse pares ad componendum opus memoria dignum industria propria, nominis celebritatem quærunt in censendis scriptis aliorum,

rum,



rum, adeo ut fere non prodeat opus, quamvis innocentissimum, quod securum esse possit à periculo censorum, sive, (ut ex ore viri cujusdam illustri audiivi) latronum in re literaria, qui etiam auctoris non parcant honori. Dantur nonnunquam censores, qui cum nomen suum publice profiteri erubescant, substituunt alios. Sed illico detegitur fucus, etiam in ipsis speciminibus Academicis pro gradu elaboratis, cum auctores titulo inscripti semetipsis juvenes inexpertos dicunt, & tamen viris dignioribus & rerum peritis bellum movere stylo immodesto non verentur. Exposui tibi, amice, Schediasmatis scopum in confabulatione nostra novissima, per quam, novasque accessiones satisfieri potest etiam iis, qui modestius aliquid monuerunt, quod Auctorem, qua est benevolentia, æquo animo acceperisse scio. *Dom.* Illud adhuc discere vellem, an etiam isto scripto revocare se passi sint serio aliqui errantes. *Jub.* Pauci sunt plerumque qui errores agnoscant. *Pessimus est, sapiens qui sibi visus, iners.* Non etenim cuique credit bona rite monenti. Sed sibi consuetam perstrepat usque lyram. Adeundus jam mihi est Typographus, & cum eo de nova editione tractandum. *Dom.* Oro te ut hodie prandere velis nobiscum more Studiosorum Academico. Videbis aliquem *Pancratium* qui non ita pridem ex Academia Jenensi ob duellum relegatus, huc advenit, & exoptat jam locum in musæo celebris cujusdam Advocati & Procuratoris



Wetzlarieſis ad addiſcendam Praxin Cameralis Judiciſ, quapropter à me petiit ut amicum quendam ipſi conciliarem. Cum itaque relinquere velle te officium huc uſque geſtum dixeris, gratiam tibi habiturus erit haut dubie, ſi ſuffici poſſet in locum tuum. *Jub.* Non reſuſo prandium & converſationem: Animus eſt fere in patinis. Peragendum tamen erit mihi inprimis negotium cujus gratia huc acceſſi. De loco meo promittere aliquid non auſim: Eſt alius expectans dudum, quem ſuccedere oportet. Novo enim homini ardua concedi nequeunt. Abſente quandoque Patrono omnia curare eſt noſtrum, mox in judicialibus, h. e. iis, qui in Audientia publica peragenda ſunt, mox in extrajudicialibus, h. e. Supplicis recte efformandis, cum petito adæquato & inſcriptione ſive Rubrica petitioni accurate reſpondente. Hanc latinis verbis facere ſolemus & quam fieri poteſt compendioſe: Petitum in Supplicatione germanicis, niſi totus Libellus ſit latino ſermone conſcriptus. *Dom.* Liberumne eſt quo quiſque uti velit idiomate vernaculo an latino? *Jub.* Minime. Latino ſermone tantum uti licet in cauſis venientibus ex Provinciis quæ germanica lingua non utuntur, puta Leodiſenſibus & Tridentinis. Porro ſollicitandi Decreta abſente Patrono etiam nobis incumbit cura. *Dom.* Quis verò ſubſcribit Supplicas abſente Procuratore? *Jub.* Rogandus eſt alius, qui pro meo Dno. Procuratore id faciat. Sed de Pancratio, quod

quod relegatum fuisse publice narras, non sane commendationis loco esse potest. *Dom.* Multi relegantur quibus non obest hæc poena Academica. *Jub.* Verum dicis, si emendentur. In ista Academia magis quam alibi esse duellantes Studiosos semper animadvertimus. Vale interim. *Dom.* Expectabimus te in prandio, ego interim decurram ad *Pancratium*. Heus Pancrati. *Pancr.* Cujusnam est hæc vox importuna? O charissime Domiti, te non credebam adesse. *Dom.* Causa est mei adventus, quod pransurus hodie sit nobiscum Jubentius, qui negotia celeberrimi Advocati & Procuratoris Camerae curat, & omnium rerum est peritus, huic desiderium tuum, cujus mentionem aliquoties iniecisti, coram exponere poteris. *Pancr.* Placet occasio. Quomodo verò oportet compellare istum virum, est haut dubie Doctor vel Licentiatus? *Dom.* Imo non habet officium cui est annexa dignitas, neque est officium perpetuum, sed pro lubitu mutabile. Multa ab isto Jubentio utilia didicisse me profiteor. De eo quod desideras ex ipso melius intelliges quidnam sit tibi expectandum. Inania titulorum non affectat. Appropinquat tempus prandii, eamus, ut convivam expectemus. Ecce revertitur noster Jubentius. Brevi tempore peregisti tua negotia mi Jubenti. *Jub.* Non erat aliud quam ut Typographo injungerem, maturationem editionis novæ. *Dom.* En tibi *Pancratium*, quem antea commendavi & rursus etiam atque etiam commenda-

tum



tum volo. *Jub.* Intellexi per Domitium desiderium tuum, Pancrati, nihil jam spondere potero, quam quod Patrono meo plurimum Principum & Statuum Imperii Consiliario Advocato & Procuratori Camerae Imperialis tui gratia sim locuturus. *Pancr.* Dominationi vestrae gratias ago, quod cum sua benevolentia me praevenire & se tam bene erga me declarare voluerit, petoque illam ut apud suam Amplitudinem Dnum. Doctorem N. unam bonam recommendationem pro me interponere non graveetur. Fui jam tres annos Studiosus Academicus, & absolvi Collegia Panfophica & Panjuridica, vellem jam in Praxi me exercere, ut etiam Schlendrianum addiscam, quod puto apud vos & praecipue apud ante fatam suam amplitudinem fieri posse. Non volui in hac Universitate incipere nova Collegia, haec omnia enim puto me jam tum audivisse, & cum volens nolens huc profectus sim, melius erit ut ad Praxin aliquando veniam. *Jub.* Charissime Domine, dixi quae per me fieri possint, scripturus sum brevi Domitio & mentem Dni. Procuratoris Patroni mei significaturus. *Dom.* Mi Pancrati, abi, & mone quæso ut maturentur dapes. *Pancr.* Faciam libenter. *Dom.* Ego ut de meliori vino quod etiam sit justæ ætatis, nobis ministrari, curavi. Estis enim vos Domini Wetzlarienses palato curatori. Nobis quandoque propinatur nescio quid mixti & recentioris vini. *Jub.* Discernere vinum à vino oeconomica vult prudentia. Deli-



Delicatus tamen non sum, neque videri volo. Quoniam jam sumus absque arbitris, mi Domiti, nesciamque quali dispositione discessurus sim à prandio, confidenter tibi dico quod istum Pancratium, ad officia quæ ambit gerenda, idoneum minime existimem. Oratio insulsa, horrida, ut ex schola obscurorum virorum prodiisse eum putares: gestus incompressi: totus habitus, ensis prælongus, cum manubrio ad totum fere corpus obtegendum comparato, gladiatorem refert. De studiis nihil magnopere mihi promitto. Putares hunc ex Collegiis, quæ ait Panfophicis & Panjuridicis coercitione potius, quam commendatione dignis, judice Morhoffio, Polyhistoris, ni fallor, capite primo, omnem sapientiam & Jurisprudentiam perdidicisse. Examen si instituatur, constabit, vix extremis digitis degustasse, prout fieri solet ab omnibus qui hæc studia veluti stadium equis conductis decurrunt. Ejusmodi homines inutiliter ad Praxin forensensem deproperant, nescio quem Schlendrianum sibi imaginati, cum quid vere sit Schlendrianus discere deberent ante omnia. Præstaret ut studiis Academicis solidioribus iste daret operam aliquamdiu, linguam latinam etiam excoleret, (sed quotusquisque est, qui, nisi ex schola inferiore attulerit, in Academia discere non erubescat) & incitiam suam exueret: Frequentant Collegia in Academiis multi, qui, quia humaniora neglexerunt à juventute, non sunt eruditiores,

(R) cul-

culpam deinde in Professores, quæ tamen ipsorum est Auditorum, referunt. Non est Dominorum Procuratorum Camera hæc expurgare paleas, neque ex quovis ligno fieri potest Mercurius. Meus certe ex iis neutiquam est, qui non nisi Schlendriano Magistro utatur. Peto, mi Domiti, ut Pancratium proposito dehorteris. *Dom.* Equidem ejus petitioni deesse non volui, tuum vero consilium mihi omnino præfertur. *Jub.* Adveniunt quandoque ad nos Studiosi præstantioribus ut ajunt Philosophiæ dogmatibus imbuti, quibus tamen nostri labores mox sunt despectui, cum ex principiis adoptatis melius erudiri se posse, vel factos esse eruditos, putent, homines ad exemplum Magistri sui nimium gloriosi, & contemtores animo, aliis intolerabiles. *Dom.* Non satis capio quid significare volueris, expectabo tempore alio explanationem. Eamus jam ad prandium, assideamus, nosque reficiamus.

COLLOQUIUM QUINTUM.

Domitius : Jubentius.

D*Om.* En adsum charissime Jubenti, invitatus abs te ad spectandam solennitatem introductionis novi in Camera Imperiali Judicis.* *Jub.* Recte

* Scripta hæc fuerit Anno 1722. cum introduceretur Illustrissimus Dominus Comes de Hebensteins.

Ecce fecisti, hodiernus enim dies huic actui est præfixus, & vides jam civium armatorum cohortes ad honorem exhibendum Dno. Judici qui Cæsaris Augustissimi nomine Imperiali Judicio est præfuturus, congregari.

Dom. Video etiam alios quos lectos esse milites, & ordines magis servare didicisse, externa species monstrat. *Jub.* Ita est. Eamus ut in loco aliquo consistamus ubi quæ observari à nobis possunt, observemus.

Commodior erit is ubi haberi solent Audientia.

Dom. Mallem ego spectare ipsum actum introductionis, & orationes audire. *Jub.* Mallem & ego, sed

in conclave ubi Collegium est congregatum, nemo nostrum admittitur. Legisti solennia præcedentis introductionis Principis Fürstenbergii? sunt enim typis

mandata. *Dom.* Legi, sed quæ curiositas mea desideraret, ibi non inveni: *Jub.* Curiosior es forte

quam te decet. Auditur jam strepitus tympanorum, concurrunt ad ordinem cives: *Dom.* Adventabit

Dnus. Judex. *Jub.* Nondum. Sunt Deputati ex

Dnis. Assessoribus, qui ut credo actum præparabunt: Hi facta Collegio relatione mox redibunt, Dnum. Ju-

dicem ad Collegium deducturi. *Dom.* Interim cur ordines suos relinquunt cives? *Jub.* Quia malunt suæ

vacare commoditati donec ad sonitum tympani convocentur. *Dom.* Tanto & tam celebri Judicio, ædificium publicum conveniret multo angustius. *Jub.* Ve-

rum dicis, sed de sumtibus nondum est res perfecta.

Dom. Quantum interim periculum à conflagratione Archivi, in hoc ædificii situ & hac qualitate ?
Jub. Magnum sane. Utinam non sit aliquando sera de sumtibus erogandis deliberatio. Ecce jam adventat Dnus. Judex, comitatus à Dnis. Assessoribus deputatis, descendamus, ut ingredientibus iis, introspeciamus saltem in conclave ubi congregatum est Collegium. *Dom.* Ego qui beneficium staturæ habeo, in tanto hominum confluxu potero multos visu superare. Vidi uno quasi ictu oculi confessum, omnes capite tecto. Sed occlusa confestim fuit janua. *Jub.* Ita moris esse didici. Cetera ex descriptione solennium quam legisse te dixisti, colliges. A meridie in loco Audientiæ etiam introducetur Dnus. Judex, & cum magnus futurus sit hominum confluxus, maturabimus nos prandium in diversorio proximo quod insigne habet stellæ, est enim ibi mensa lautior & vinum bonum. *Dom.* Pretiumne facile ? *Jub.* De hoc tibi nulla hodie erit cura : Nemo adhuc de immodestia hospitis istius est conquestus : Est etiam mihi notus, & bene nobis erit apud ipsum : Credo enim in hodiernam diem præparasse & culinam & cellam vinariam. *Dom.* Hic sane omnia bonum odorem habent, & lautiores sunt dapes quam tibi fuere apud me. *Jub.* Non semper oleum, neque ego hac utor quotidie mensa. Erit nobis hic dies lætitiæ. *Dom.* Audiuntur rursus tympana. *Jub.* Properandum ergo est ad Audientiam,



tiam, absolvetur brevi, & redibimus huc. Curabit interim hospes, ut vervex iste assus cum cervino dorso conserveretur calidus. *Hospes*: Fiet. *Dom.* Video cum Dno. Judice utrumque Dnum. Præsidentem, video & quatuor Dnos. Assessores, sedentes. *Jub.* Ita est moris: Et repetitur hæc solennitas vicibus tribus. Unusquisque etiam Assessor novus, tribus Audientiis post introductionem immediate sequentibus, sedere solet, non ut quomodo sese gerere debeat, quod perperam ita dicitur, discat, sed ut publice constet esse Assessorem, & pro tali habeatur. *Dom.* Peracta jam est res. *Jub.* Redeamus ad prandium. *Dom.* Quandoquidem ita jubes, non recuso, sed revertendum mihi est hodie domum, ne Dominus equi quem conduxī putet mihi eum à latronibus esse ereptum.

Jub. Nullum hic periculum. Assideamus.

Martial. *Lib. 9. Epigr. 81.*


*Lector & Auditor nostros probas Aule Libellos
Sed quidam exactos esse Poëta negat,
Non nimium curo, nam cœna fercula nostra
Malim convivis quam placuisse cocis.*



GUILIELMUS FRANCKEN- BERGIUS,

JUBENTIO, Amico suo

SALUTEM!

 Ccepi cum Literis tuis humanissimis Libellum cui Titulus *Schlendriani*, à me olim compositum, tua vero cura editum & Colloquiis lepidis illustratum, nunc autem novis Accessionibus auctum. Scripseras tu quidem in exordio editionis secundæ Anno 1722. typum repetendum non fore, neque dubito tibi tunc fuisse causas; eam tamen tibimet non dixisse te legem intellexi, quam transgredi tibi non liceret unquam. Video etiam tibi hodie esse rationes novam hanc editionem curandi, neque ignotæ sunt mihi multorum, quibus hoc scriptum placuit, voces, quod priores editiono-

tiones dudum in Bibliopoliis fuerint desideratæ. Pervenit sane ad eruditos etiam externos, quibus acceptum fuisse, eorum scripta testantur. * De Accessionibus novis quas addidisti, mi Jubenti, video eas caute satis abs te positas, ne cuiquam esse possint offendiculo. In Colloquio Quarto addidisti nonnullas narrationes Studiosi cujusdam de thematibus Metaphysicis, quæ an iste Studiosus satis perceperit ab Auctore, & an hic omnes conclusiones sit admittens, & qua ratione explicaturus, ulteriore opus habet inquisitione. In eo tamen habes me consentientem, quod istiusmodi principiis novis carere possit absque periculo res publica. Ceterum, cum petieris ut editioni huic quam dare constituisti, adderem Præfationem, non deesse volui huic desiderio tuo,

&

* Vide inter alios J.Cti Megapolitani Celeberrimi Ernest. Joach. Westphalii *Traſſatum admodum commendabilem de Consuetudine ex Sacco & Libro pag. 271. & alibi.*

& transmittō tibi Libello præmittendam
pro lubitu. In ea tamen respexi potissi-
mum ad ipsum à me antehac compositum
Libellum, non vero ad subjuncta Collo-
quia, quæ relinquenda tibi esse putavi.
Vale amicissime Jubenti, & in officio,
quod jam dudum contigisse tibi pro
merito scio, feliciter
perge.





005664538
005664537 by Google